

# PAGKAUHAW



Salamat kanimo, Igsoong Vayle. [Blangko nga bahin sa teyp—Ed.]

Maayong gabii, higala. Usa ka prebilihiyo ang maania dinhi niining gabhiona. Ikaduha ko kining higayon nga makaanhi dinhi sa Grantway Assembly, uban sa akong minahal nga igsoon, si Mack, ug sa tanan na niining buutan nga mga estap dinhi, ug sa mga nakigduyog nga mga Cristohanon gikan pa sa nagkalain-laing mga kasimbahanan, si Igsoong Lee Vayle. Ug bag-o ko lang nahibalag ang usa ka igsoon dinhi, nga, usa—usa ka suod nga higala ni Igsoong F.F. Bosworth, ug wala gani siya nasayod nga mipanaw na si Igsoong Bosworth aron makigkita sa atong Ginoo. Ingon ko, “Nabati ko nga naila ko ang Eliseo nga mao’y nagbubo og tubig sa mga kamot ni Elias,” sa diha nga didto sila sa laing nasud ug wala nasayod nga mipanaw na si Igsoong Bosworth aron makigkita sa atong Ginoo, sa edad nga otsenta’y kwatro.

<sup>2</sup> Karon gusto kong mangayo’g katahuran sa mga katawhan nga nakakonekta sa telepono karong gabhiona, sa tibuok nasud, gikan sa California ngadto sa New York, ug sa Texas ug—ug sa nagkalain-laing mga bahin sa nasud, gikan sa Maine paingon sa California. Busa, aduna kita’y usa—usa ka sistema sa pagkonekta sa niining mga telepono, nga nahimong usa ka dakung panalangin. Ug nasabtan nato karon, pinaagi sa atong buutan nga higala, si Igsoong Pearry Green, nga aduna sila’y usa—usa ka gamay’ng himan nga mahimong ibutang nila diha sa inyong mga telebisyon, ug nga dili lamang kini para sa telepono kondili mamakita na kini mismo diha sa inyong telebisyon, usab. Ug makita na nila kini karon.

<sup>3</sup> Ug, Igsoong babaye nga Mack, nalipay ako nga makita kang anaa sa maayong kahimtang, nga naglinkod dinhi sa may organ, karong gabhiona. Ug daghan sa akong mga kahigalaan nga makita ko nga gikan pa sa Sierra Vista, ug si Igsoong Borders . . . o si Igsoong Roberson, diay, nga taga-Indiana; kadaghan. Gusto kong isulti sa mga kaigsoonan diha sa Tabernakulo, karong gabhiona, mora’g ang katunga kanila ania dinhi, ug gikan pa sa tabernakulo sa Jeffersonville.

<sup>4</sup> Ug sa akong higala dinha, si Igsoong Kuhn, bahin sa imong gitawag, bahin niadtong maysakit, ang kadtong paghangyo. Nagaampo ako alang niini, Igsoong Kuhn. Magkaaduna ka lang pagtoo. Ayaw’g kabalaka. Mamaayo gayud kini.

<sup>5</sup> Ug sa dapit didto sa Texas, Igsoong Blair, kung nagapaminaw ka man niining gabhiona, igsoon ko, hinumdumi lang kini; nga ang Dios Kinsa mao’y nakapalabang kanimo sa una, makapalabang usab kanimo sa ikaduhang higayon.

Ug nagatoo kami nga igahatag kini sa Dios kanimo. Ug ayaw dawata ang pagpamakak sa Yawa bahin sa bisan unsa mang butang. Timan-i lang nga ang Dios mao'y Dios, ug aduna'y . . . ug sa gihapon Siya'y nagapabilin ang mao sa gihapon kagahapon, karon, ug hangtud sa kahangturan. Ug ginahigugma nato Siya ug ginatoohan Siya, ug kami naga-ampo alang kanimo.

<sup>6</sup> Sa tanan namong mga kahigalaan sa California; kang Igsoong Mercier ug kanila nga ania dinhi sa Arizona, daghan pang uban nga mga lugar, sa Phoenix; ug si Igsoong Williams, ug kaninyong tanan nga nagapaminaw dinha karong gabhiona, sa tanan nang dapit, bug-os gayud kaming nagapasalamat; ug didto sa Georgia. Ug bug-os gayud kaming nagapasalamat sa matag usa kaninyo. Ang Ginoo magapanalangin kaninyo.

<sup>7</sup> Mabati ko ang mainiton nga pag-abiabi kanako dinhi karong gabhiona, sa niining maayong iglesia, ang Assembly of God dinhi sa Grantway, ug nga kauban si Igsoong Mack, ang maayo kong higala. Gipanalanginan sa Dios si Igsoong Mack. Akong mahinumduman usa ka higayon didto sa Canada, nga siya kaniadto. . . ginasubay ko niadto ang usa ka dalan pabalik, nga sakay sa usa ka kabayo, sa dapit didto sa mga kalasangan, ug gisultihan ako sa Balaang Espiritu sa pagpanaug ug iampo si Igsoong Mack. Niadtong panahona atua siya sa malisod nga kahimtang, ug giayo siya sa Ginoo. Ug gani mapasalamaton gayud ako tungod niana, ug nga mahiuban sa panagtigum karong gabhiona nga kauban siya, sa pagsimba sa Ginoo sa niining maanindot nga Kamatuoran.

<sup>8</sup> Usa ka lalaki nga nagalingkod niadto sa entablado, sa akong luyo, ang miingon, "Siguro wala mo na ako nailhan." Miingon, "Usa ka higayon imo akong gipasakay, ingon nga mang-angkasay," ug, dili ko kabalo, kung asa nga dapit sa Boston o kung asa man, "Sa Detroit, nga maga-angkas sa mga moagi nga sakyanan."

<sup>9</sup> Ug ingon ko, "Bueno, kanunay kong ginapaningkamotan nga itunol ang akong kamot, kung mahimo ko, alang niadtong mga nanginahanglan."

<sup>10</sup> Ug busa, niining gabhiona, nanginahanglan kitang tanan. Ug atong ginaampo nga itunol sa Dios ang Iyang kamot dinhi kanato karong gabhiona, sa pagtabang, sa mga panalangin, ug sa Iyang grasya ug kaluoy.

<sup>11</sup> Karon, medyo kanunay akong mahilig mamulong og dugay, apan paningkamotan ko nga dili buhaton kana karong gabhiona. Tungod kay, may mga tawo didto sa Ohio nga bag-ohay lang mitawag, si Mrs. Dauch ug ang grupo didto, sila ni Igsoong McKinney ug Igsoong Brown, ug silang tanan nagpaminaw didto sa Ohio. Among ginapahiabot kaninyo ang among mga pagpangumosta, usab. Gabii na kaayo didto sa New York, ug sa pagtoo ko nga mga alas onse o alas dose na, niining orasa,

didto sa New York. Ug nangadto ang mga kaiglesiahan ug naghulat hangtud niining orasa, para lang sa maong bulohaton. Mapasalamaton kami alang niadtong mga buutang mga higala nga anaa sa bisan asang lugar.

<sup>12</sup> Karon sa dili pa nato ablihan ang Pulong, makig-estorya sá kita sa Tagsulat, sa makadiyut, samtang atong iduko ang atong mga ulo.

<sup>13</sup> Minahal nga Langitnong Amahan, kami...tumang nagkalipay ang among mga kasingkasing, alang sa prebilihiyo nga aduna kami maingon nga buhi dinhi karong gabhiona, ug nga nagkatigum kauban sa Imong mga katawhan. Maong mga tawo...ug among ginatoohan nga mamahimong buhi sa wala'y katapusan. Aduna na kami karon og Kinabuhing Wala'y Katapusan, tungod kay, "Imong gihatag ang Imong bugtong Anak, aron ang tanan nga motoo Kaniya dili malaglag, kondili may Kinabuhi nga dayon." Sa Iyang pagpanaw dinhi sa yuta, gitudlo Niya kanamo, "Ang nagapatalinghug sa Akong Pulong ug nagatoo Kaniya nga nagpadala Kanako, may Kinabuhi nga dayon; ug dili pagahukman, hinonoa nabalhin na gikan sa kamatayon ngadto sa Kinabuhi, tungod kay mitoo kami sa bugtong nga Anak sa Dios." Daw sa unsa Ka namong ginapasalamatan tungod niining dakung Manluluwas! Ug nagaampo kami, karong gabhiona, nga ang Iyang gamhanang Presensiya magapanalangin gayud kanamong tanan dinhi, samtang magabasa kami sa Iyang Pulong ug maghisgot bahin Niini. Tugoti nga dalhon kana sa Balaang Espiritu ngadto sa matag kasingkasing sa tibuok nasud, Ginoo, kon diin man nga nagkatigum ang mga tawo.

<sup>14</sup> Panalangini ang uban pang mga ministro nga anaa karon sa pulpito. Nagaampo kami, Amahan, nga Imong panalanginan kining Grantway Assembly; ang pastor niini, iyang asawa, iyang mga anak; ang mga diyakono, mga tinugyanan, ug ang tanan nga miyembro sa board. Ug, Amahan, hinaut nga mamuhat kaming magkauban alang sa Gingharian sa Dios, samtang nga aduna pa'y igong Kahayag nga makita kung asa ang among ginalihokan, kay moabot ang takna kon diin ang tawo dili na makapamuhat. Ug, Amahan, samtang nga aduna pa kami niining prebilihiyo, hinaut nga among—hinaut nga among pahimuslan ang kahigayonan, Ginoo. Hinaut kami, nga itugot kini kanamo. Ayoha ang masakiton ug ang nag-antus sa tibuok kayutaan. Hinaut nga mabati ang Presensiya sa Dios diha sa matag suok ug kanto sa nasud, karong gabhiona.

<sup>15</sup> Naamgo namo nga pahampak na ang paghukom. Dagkung mga siak ang nagakahugno na, ug nagakatay-og ang nasud, ug mga linog sa nagkalain-lain nang mga lugar. Grabeng mga butang sa kasaysayan nga nadungog namo sa nangaging mga panahon, mahitungod sa paghukom, diha sa Biblia, ug makita na namo kini nga nagakahitabo karon pag-usab. Nagaingon

ang propesiya, “Sama sa nahitabo kaniadto sa mga adlaw ni Noe, maingon man usab kini sa pag-abot sa Anak sa tawo. Sama sa nahitabo kaniadto sa mga adlaw ni Lot, maingon man usab sa pag-abot sa Anak sa tawo,” ug makita namo nga nagakahitabo na kini karon. “Ginapanguyapan sa kalisang ang kasingkasing sa tawo; mga managkalibug sa panahon; kagulangan sa kanasuran.” Dios, nasayod kaming ania na kami sa katapusang panahon.

<sup>16</sup> Tabangi kami, Ginoo, sa—sa pagdala sa Mensahe ngadto sa matag suok ug kanto, ngadto sa matag anak nga Imong gikatagana na ngadto sa Kinabuhi. Itugot kini, Ginoo. Amo kining ginapangayo sa Ngalan ni Jesus. Amen. Ginoo, panalangini karon ang pagbasa sa Imong Pulong.

<sup>17</sup> Karon daghan kaninyo ang medyo gustong tan-awon sa Biblia, kung asa nagabasa ang ministro. Ug gusto kong mobasa karong gabhiona, og pipila, tulo ka mga bersekulo gikan sa Mga Salmo, Salmo 42, sa paagi lang nga magkaaduna og teksto. Ug aduna ko’y pipila ka mga Kasulatan nga nahisulat dinhi, ug gusto kong mopahinungod kanila, kung mahimo ko, samtang mopadayon kita sa pipila ka minuto, aron hisgotan ang bahin niining hilisgutan. Ang Salmo ni David. Si David ang mao’y nagsulat sa Mga Salmo.

<sup>18</sup> Samtang inyong ginaablihan, mahimo kong isulti kini. Daghan nga mga tawo ang nagaingon, “Bueno, dinihogan ba diay ang Mga Salmo?” Sigurado, dinihogan gayud sila. Sila’y . . .

<sup>19</sup> Ang bisan unsa man nga—nga anaa sulod niining Biblia dinihogan, bisan kon kasaysayan man kini, bisan kon mga kalantahon man kini, bisan unsa man kini. Dinihogan kini. Nag-ingon si Jesus, “Wala ba ninyo nabasa kung unsa’y giingon ni David diha sa Mga Salmo?” Ug dayon nahunahunaan ko, ang Mga Salmo, siyempre, mga kalantahon. Ug kung dinihogan sa Dios ang mga kalantahon, nga, nagatoo akong mao gayud, ug ma-propesiya usab, nagalaum ako nga anaa pa ako niana nga adlaw sa dihang ginakanta na kining kalantahon.

Magkaaduna’y usa ka panagtigum sa kawanangan,  
 Sa nianang maanindot, maanindot nga umalabot;  
 Mamakita ta ka, ug pangumostahon ta ka didto;  
 Sa nianang Puloy-anan sa luyo sa kawanangan;  
 Ingon nianang pagkanta nga wala pa sukad nadungog, wala sukad nadungog sa mga mortal nga igdulogog,  
 Mamahimayaon kini, ang pahayag ko!

Ug ang Anak sa Dios Mismo ang Maong  
magapanguna  
Sa nianang panagtigum didto sa kawanangan.

Oh, ako—gusto kong maanaa gayud nianang higayona!

20 Karon sa Salmo 42.

*Ingon nga ang lagsaw nangandoy sa pagpangita  
sa tubig sa kasapaan, mao usab ang akong kalag  
nangandoy sa pagpangita kanimo, O Dios.*

*Ang akong kalag ginauhaw sa Dios, sa Dios nga buhi:  
anus-a moanha ako ug magapakita sa atubangan sa  
Dios?*

*Ang akong mga luha mao'y akong tinapay sa adlaw ug  
gabii, samtang ang akong . . . sila sa kanunay nagaingon  
kanako, Hain man ang imong Dios?*

21 Siguro, si David, diha sa pagsulat niining Salmo, siguradong anaa gayud sa kagul-anan. Ug kinahanglan sa kasagaran nga maagian gayud ang kagul-anan aron nga mapahigawas ang pinakamaayo sa tawo. Niini, gayud, nga kon kanus-a ang Dios . . . nagakanaug sa dihang nagapuasa kita, sa makadaghang higayon, aron ibutang ang atong kaugalingon sa maong kahintang aron nga mahipadaplin nato ang atong kaugalingon. Ug siguro, nga sa dihang napahamtang si David sa niining mga kahintang, dayon gisugdan niya nga palandongon ang Ginoo, nagasugod na sa pagpamalandong sa niining mga butanga.

22 Sa makadaghang higayon, ginabutang kita sa Dios sa—sa malisod nga mga kahintang kon diin nga kinahanglan na natong mohangad. Kinahanglan pa gani usahay nga maghigdaay pa kita sa ospital, o sa usa ka higdaanan kon asa man, aron makahangad nga makita kon asa nagagikan ang dakung mga panalangin sa Dios.

23 Karon ang pulong nga gusto kong hisgotan karong gabhiona, usa ka pulong nga gikan sa Biblia, ug makita kana sa ika-2 nga bersekulo, “pagkauhaw,” ang pulong: *Pagkauhaw*. Gitan-aw ko sa diksyunaryo sa dihang ginapangita ko niadto ang kahulogan niining pulonga.

24 Gihunahuna ko ang bahin sa usa—usa ka sermon sa usa ka higayon niadto, nga akong giwali bahin sa *Pagkauhaw sa Kinabuhi*. Ug gibase ko kadto sa Mga Salmo, usab, sa dihang nagsulti si David, “Ang Imong kabalaoran,” nagtoo ako, “labi pang bililhon kanako kay sa kinabuhi.”

25 Dayon ginatan-aw ko ug ginahunahuna ang bahin nianang pulong “pagkauhaw,” busa gipangita ko sa diksyunaryo, aron tan-awon kung unsa’y kahulogan niini. Ug ania kung unsa ang ginaingon ni Webster, “Usa kini ka masakit nga pagpangandoy,” usa kini ka masakit kaayo, sa diha nga ginapangandoy mo

gayud kaayo ang usa ka butang hangtud nga nahimo nang masakit kini.

<sup>26</sup> Karon, kini—dili kini nga usa ka dili-natural nga butang, ang mauhaw. Ang pagkauhaw mao'y usa—usa ka natural nga butang. Usa lang kini ka butang nga gikahatag kanato sa Dios, nga mahimo kitang, aron hatagan kita og usa—usa ka pagpangandoy alang sa usa ka butang. Ang Dios usa ka higayon, usab, naghatag kanimo og usa—usa ka tore sa pagkontrola, usa ka butang nga anaa sa kinasuloran mo, nga—nga mao'y nagakontrola sa niining nagkalain-laing mga pagpangandoy. Ug kini nga pagkauhaw, kining tore sa pagkontrola nga anaa sulod sa kasingkasing sa tawo, mao'y butang nga gikahatag sa Dios kaniya aron—aron magpahibalo kaniya sa mga pagpangandoy nga kinahanglanon niya.

<sup>27</sup> Karon aduna'y duha ka nagkalain-laing matang sa pagkauhaw. Aduna'y usa ka pagkauhaw, sa pisikal. Ug aduna'y usa ka pagkauhaw, usab, nga espirituhanon. Gusto kong basahon kini, kung unsa'y giingon ni David, pag-usab.

*Ang akong kalag ginauhaw sa Dios, sa Dios nga buhi: . . .*

<sup>28</sup> Dili sa kung unsa'y masaysayon, o usa ka butang nga nahitabo na sa nangaging mga katuigan, o—o usa ka sugilanon nga gi-estorya sa kung kinsa man; kondili, “sa Dios nga buhi,” usa ka Dios nga anaa sa tanang panahon. Ug giuhaw ang iyang kalag alang nianang Dios, dili sa kung unsa man nga butang nga masaysayon.

<sup>29</sup> Karon mahibaloan nato, nga ginahatag sa Dios kaninyo ang tore sa pagkontrola, aron ihatag kaninyo ang mga butang nga gikinahanglan ninyo. Karon, ang nagakontrola nga tore nga anaa sa inyo mao ang nagagiya kaninyo. Ug kini nga pagkauhaw nagaagi subay niining nagakon- . . . tore, nagakontrola nga tore, ug ginasultihan kamo kung unsa'y inyong gikinahanglan, diha sa espirituhanon. Ang nagakontrola nga tore nga anaa sa lawas, ug nga anaa sa kalag, usab. Aduna'y nagakontrola nga tore sa lawas, nga ginasultihan kamo sa panginahanglan nga gikinahanglan sa inyong lawas, ug nagapahibalo kini kaninyo pinaagi og pagkauhaw. Usab, aduna'y nagakontrola nga tore diha sa inyong kalag, nga ginasulti kaninyo ang mga espirituhanon butang nga inyong gikinahanglan, usa ka butang sa inyong espiritu, ug, ug makaingon ka pinaagi niini kung unsay matang sa kinabuhi ang nagakontrola kanimo.

<sup>30</sup> Sa diha nga inyong—sa diha nga inyong makita kung unsa ang inyong mga ginapangandoy, nan makaingon kamo, pinaagi niana, kung unsa'y matang sa butang ang anaa sulod kaninyo, nga mao'y nagamugna sa niini nga pangandoy nga anaa kaninyo. Kita n'yo, aduna gyu'y usa ka butang nga inyong gikauhawan, ug kini—ug makasulti kini kaninyo diha sa inyong kalag kung unsa

nga pangandoy kini, pinaagi sa kinaiya sa maong pangandoy nga anaa kaninyo. Nagalaum ako nga masabtan ninyo kana.

<sup>31</sup> Aduna’y usa—usa ka nagakontrola nga tore para sa kalag, ug usa para sa lawas, ug ang matag tore mao’y usa ka tig-pasidaan alang sa mga panginahanglan sa usa’g usa. Nagapasidaanay ang usa’g usa sa panginahanglanon nga ginapanawagan sa usa pa nga nagkinahanglan, nagapadala kini og usa ka dagsa sa pasidaan.

<sup>32</sup> Pananglitan, ang—ang unod ginauhaw aron nga tagbawon ang mga panginahanglan sa lawas, ug ang espiritu nagapangandoy alang sa mga butang nga anaa sa kalag, ang pagpangandoy, ug sa makadaghang higayon ang mga niini nagapakig-away sa usa’g usa. Makita nato dinha, nga daw sa unsa ka dakung kagubot sa karon, nga daghan kaayong mga tawo nagapaninguhang magkinabuhi tali nianang duha ka mga pagpangandoy. Kay, ang usa kanila nagapangandoy sa mga butang nga iya sa kalibutan, ang usa usab nagapangandoy sa mga butang nga iya sa Langit.

<sup>33</sup> Sama sa giingon ni Pablo, nga ginahulagway dinha sa Mga Taga-Roma 7:21, “Sa dihang buot ko nang buhaton ang maayo, dayon ang dautan haduol kanako.” Sa diha nga paninguhaon mo na, nagkaaduna na ba gayud kamo niana nga kasinatian, mga Cristohanon? Nga sa dihang ginapaninguhaan mong buhaton ang butang nga maangayon, paninguhaon ang pagbuhat sa maayong butang, dayon mahikaplagan mo nga anaa ang Yawa, sa matag higayon, aron nga samukon ka gayud, sa tanan nga imong. . . Ug kana ang usa ka maayong butang, niana. Gusto kong ingnon kini, aron nga masayran sa mga Cristohanon. Nga sa dihang inyong—sa dihang ginasugdan ninyo pagbuhat ang usa ka butang, ug aduna’y butang nga nagapaninguha sa kanunay nga samukon kamo sa pagbuhat niini, buhata kini sa gihapon. Yawa kana, nga nagapaninguhang babagan ka sa pagbuhat kung unsa’y husto.

<sup>34</sup> Karon, sa makadaghang higayon, aduna ko’y mahibalag nga mga tawo nga medyo madali manerbiyos. Sa dihang makita nila nga ginapaningkamotan nila pagbuhat ang usa ka butang, ug—ug tanan na lang nga butang ginababagan kini sa luyo’g luyo, moingon sila, “Dili man siguro kini ang kabubut-on sa Ginoo.” Kita n’yo? Karon ayaw tugoting bakakan kamo sa Yawa nga ingon niana.

<sup>35</sup> Unang butang, mao ang hibaloon kung kabubut-on ba kini sa Dios, o dili. Ug dayon kung gusto mong hibaloon kung kabubut-on ba kini sa Dios, susiha sa Biblia. Kana ang butang nga—nga nagatul-id kanimo, mao ang Pulong sa Dios; ug dayon kung nakita mo na anaa kini sa Pulong sa Dios, para nga buhaton mo kini.

<sup>36</sup> Sama, pananglitan, sa pagpangita alang sa bautismo sa Espiritu Santo. Sa makadaghang higayon, nakahibalag ako og mga tawo, nagaingon, “Bueno, nangita ako sa Espiritu Santo, ug wala ko gayud madawat Kini. Wala ako nagatoo nga alang Kini kanako. Sa matag higayon nga moluhod ako, nagakasakit ako. Ug moampo ako, kung magpuasa man ako, nagakasakit ako. Ug kung sulayan kong ipadayon tibuok gabii, mopadayon nga nakamata, naga-katulgon ako kaayo. Ako—dili na ako makatindog.” Hinumdumi, ang Yawa kana. Tungod kay, tuyo sa Dios nga madawat mo ang Balaang Espiritu. Alang Kini sa kang bisan kinsa nga may tinguha.

<sup>37</sup> Sa makadaghang higayon mahikaplagan mo, sa dihang naiampo na kamo, diha sa usa ka panagtigum, alang sa Balaanong pagpang-ayo, mahibaloan mo dayon pagkasunod adlaw, wala’y duda, nga himoon kana sa Yawa nga doble pa ka grabe kay sa wala pa niadtong maong adlaw. Kita n’yo? Hinumdumi, si Satanas lang kana nga ginasulayan nga ipahilayo ka sa panalangin nga inandam sa Dios alang kanimo. Kita n’yo? Ayaw gayud pagpaminaw nianang tawhana. Kita n’yo? Magpadayon lang gayud sa kanunay.

<sup>38</sup> Nagkaaduna ako niana og usa ka kasinatian bag-ohay pa lang sa pag-adto ko sa Africa. Kung aduna man ko’y panahon nga nagpalisod-lisod kanako ang Yawa, mao ang pag-adto ko sa Africa sa niining ulahing higayon. Nahimo kadtong usa sa—usa sa pinakamaayong mga panagtigum ug mga higayon nga naadtoan ko gayud sa ubang nasud. Ako’y, nagatoo ako, nga mas daghang mga butang ang nangahimo niadtong hamubong panahon nga atua ako didto, wala’y labot sa akong mga biyaheng pagpangayam, kay sa nahimo ko na sukad-sukad. Gidahum ko sa una pa nga dili gusto sa mga kaiglesiahan nga moadto ako didto, ug nahibaloan ko . . . Nakadawat ako og sulat gikan sa usa ka tawo, nga mao lagi kadto, oh, dili nila gusto nga moadto ako didto, ang tibuok asosasyon; ug nasayran nga usa ra man kadto ka tawo, nga gigamit lang ang letterhead sa usa ka organisasyon, nga miingon, “Dili ka namo gusto,” ang pasabot niya nga siya ug ang iyang pamilya. Kita n’yo? Busa dayon sa pag-adto ko na didto . . . Kita n’yo, “kami” gayud, siya na kadto ug ang iyang pamilya; ug dili kadto ang mga tawo, gayud. Busa, karon usa na kini ka dakung lugar nga naablihan alang kanato.

<sup>39</sup> Nakita n’yo, sa diha nga giingon ni Pablo, “Sa dihang buot kong buhaton ang maayo, dayon ang dautan haduol kanako.”

<sup>40</sup> Tugoting moduol ang usa ka batan-ong kinabig ngadto sa altar karong gabhiona, kon asa man niining tabernakulo, o—o sa tibuok man nga nasud; ug hinumdumi gayud, nga pagkaugma, si mama mamahimong mas samut pa ka masukanon kay sa unsa siya kanhi, si papa magkabalaka na gayud, ug ang tanan nang mga ka-eskwela. Ug tanan na lang dili na maayo ang nagakahitabo, tungod kay si Satanas kini nga gusto



kang pabalikon. Gusto niyang mahitipas ka sa maong Dalan. “Sa dihang buot kong buhaton ang maayo, dayon ang dautan sa kanunay haduol kanako.”

<sup>41</sup> Karon tan-awon nato ang pagkauhaw, ug nga makita nato kung ang pagkauhaw usa ba gayud ka natural nga butang. Aduna’y mga tawong nag-ingon kanako, “Oh, wala pa gayud nahitabo nga nauhaw ako. Nagtoo ako nga alang lang kini sa mga tawo nga gusto mamahimong mga Cristohanon.” Oh, dili. Sayup kana. Sa tinud-anay butang kini nga anaa na sa matag tawo. Siguradong tinuod kini. Sa pag-abot nato niining nasura niadtong mga unang panahon, nahibalag nato ang mga Indian dinhi. Ug ang mga Indian, bisan pa nga mga pagano sila niadtong panahona, ginasimba nila kaniadto ang adlaw o unsa man. Basta nga tawo sila, aduna gyu’y butang diha kanila, usa ka natural nga pagkauhaw, nga nagapanawag alang sa Dios, kon asa man.

<sup>42</sup> Didto sa mga kalasangan, atua ako bag-ohay pa lang, nga ang pinakaduol nga sibilisasyon upat ka gatus ug otsenta ka milya, sa usa ka gamay, diyutay’ng banwa sa mga tulo ka libo ka mga tawo, sa Beira, sa Mozambique. Nakahibalag kami og mga lumad nga wala pa gani . . . wala pa gayud nakakita og puti nga tawo. Nakakita ako og usa ka lumad nga batang babaye, wala siya’y saput, (ang bisan kinsa man kanila halos wala’y saput), ug nakalingkod siya sa itaas sa kahoy. Ug ginasundan ko niadto ang liyon, ug aduna’y . . . Aduna’y butang nga nadungog ko nga sama sa usa ka tawo, nga nagasiyagit. Kining lumad nga batang babaye nga naglingkod sa itaas didto, budlat ang mata, nga nagkugos og usa ka bata. Ug ang iyang gikahadlok . . . Mao lang kadto ang iyang pagpanalipod, mao ang pagkatkat sa kahoy, sa paglikay gikan sa usa ka liyon, sa liyopardo o sa kung unsa man, o sa unsa mang mananap. Ug iya akong nakita, ug nadungog nga usa kadto ka tawo, apan sa pagtan-aw niya ug nga usa kini ka puti nga tawo! Wala pa gayud siya nakakita og usa sa tibuok niyang kinabuhi, kita n’yo, ug halos mamatay siya sa kahadlok. Kita n’yo?

<sup>43</sup> Apan sa pagkahibalag namo niadtong mga tawo, bisan sa niadtong kanhiay nga kahimtang didto, nagasimba sila sa gihapon. Sa wala pa kami mihangyo og tabang para sa liyon, gibubo nila ang mga bininlod nga mais (mao kana ang ilang ginakaon) diha sa usa ka gamay nga dahon, ug nagpalakpak sila sa ilang mga kamot, ug nanawag sa espiritu sa kang kinsa mang gamhanan nga wala sila nahibalo kung asa man (sama sa usa ka santong magbalantay o unsa man, ngadto sa usa ka Katoliko), aron proteksyonan sila, nga dili sila mapatay sa panahon nga mosulong kining liyon.

<sup>44</sup> Kita n’yo, natural kini nga butang. Dili kini usa ka dili-natural nga butang ang mauhaw para sa Dios. Usa kini ka natural nga butang. Butang lang kini nga kinahanglan mong buhaton. Gihimo kang ingon niana sa Dios. Ug kini dili ingon

nga labaw sa tawo, sa tinud-anay usa lang gayud kini ka yanong tawo. Dili kini nga espesyal sa pipila ka tawo.

<sup>45</sup> Moingon sila, “Bueno, nakakita na ako og pipila ka mga tawo nga nagkinabuhi sa ingon ka—ka madaugon nga kinabuhi, nga anaa sila kanunay sa itaas nga kahimtang, nga nagadayeg sila sa Dios. Mabati ko unta ang ingon niana.” Bueno, ang hinungdan nga nagabati ka og ingon niana, ang kauhaw kini nga anaa kanimo. Ug usa lang kini ka natural nga butang. Para kini sa tanang tawo, ang mauhaw sa Dios.

<sup>46</sup> Karon pagahisgotan nato ang pipila sa maong mga natural. Una mao ang pagkauhaw. Hisgotan nato, pananglitan, ang pagkauhaw sa tubig. Sama sa giingon ni David dinhi, ang pagkauhaw alang, sa “sa tubig.” Ang pagkauhaw sa tubig, gikinahanglan sa lawas ang tubig. Ug kung dili mo hitsohan kana nga pagkauhaw, mamatay ka. Mawad-an ka’g tubig, ug dili ka—dili ka mabuhi. Kung dili mo mahitsohan og tubig kana nga pagkauhaw, aron matagbaw kana nga pagkauhaw sa natural nga lawas mamatay ka dayon. Dili ka mabuhi og dugay. Mabuhi ka nga mas taastaas pa nga wala’y pagkaon kay sa nga wala’y tubig. Tungod kay, makapuasa ka sulod sa kwarenta ka adlaw (nga gihimo ni Jesus), nagtoo ko, nga wala’y—wala’y pagkaon, apan dili mo kana mahimo sa ingon niana ka dugay nga wala’y tubig. Mang-uga ka na lang ug mamatay. Kinahanglan nga aduna ka’y tubig. Ug—ug ang pagkauhaw nga nagaabot kanimo, aba, nagapakita kini nga ang lawas nagkinahanglan og usa ka butang, aron nga padayon kining mabuhi. Ang lawas kinahanglan nga aduna gayud og tubig, aron nga padayon kining mabuhi. Ikaw kapin sa otsenta ka porsiyento nga tubig ug petroleum, bisan unsa pa, ug gikinahanglan mong gamiton ang mga tinubdan niini, aron nga padayon kang mabuhi. Sama sa gikaingon ko na, kung dili mo kini panumbaligon mamatay ka.

<sup>47</sup> Ang pagkauhaw usa usab ka pahamatgon. Usa kini ka orasan nga nagapahamatngon, kanang pagkauhaw. Ginapatingog sa kalag ang orasan sa pagpahamatngon, usa ka gamay nga hagongan sa sulod nimo nga nagasulti kanimo nga nagpahipi na sa duol ang kamatayon. Nga, kung dili ka dayon makainom og tubig, mamatay ka gayud. Ug nagakusog kini ug nagakusog, hangtud sa katapusan nga padayon mong dili pagapanumbaligon kini ug mamatay ka na, tungod kay usa kini ka orasan sa pagpahamatngon.

<sup>48</sup> Sama sa paghulagway ni David niini dinhi sa Mga Salmo, “Ingon nga ang lagsaw nangandoy sa pagpangita sa tubig sa kasapaan, mao usab ang akong kalag nangandoy sa pagpangita Kanimo, O Dios.” Ingon nga ang lagsaw nangandoy sa pagpangita sa tubig sa sapa!

<sup>49</sup> Kanunay kong gihunahuna, sa pagbasa ko niini bahin kang David. Lasangnon si David, usa ka mangangayam. Ug

nagpangayam siya og usa, siyempre. Ug daghan kanato, sa karong panahon, nagapangayam niini. Ang lagsaw usa ka usa.

<sup>50</sup> Ug mahikaplagan namo, kung nakakita na kamo og mga iro, ang iro nga kalasanon mangtukob og usa ka usa. Ug aduna sila kasagaran, sama sa lobo, usa ka tango. Ug mahimo niyang tukbon ang usa sa itaas mismo sa dalunggan, *dinhi*, ug wisiwisihon ang gibug-aton niini. Paakon niya ang tutunlan sa usa, ug wala na dayon kahigayonan ang usa. Apan usahay ang—ang—ang maong iro, sama sa Africa didto, tukbon sa iro nga kalasanon ang usa diha sa kilid niini, kung masipyat niya nga tutunlan. Tukbon niya, sa ikaduhang higayon, ang kilid. Ug kung ang usa aduna’y igong kusog ug igong kaabtik, makalingkawas siya sa maong iro.

<sup>51</sup> Mas abtik kaayo ang usa. Ukoyon siya sa maong iro pag-dili siya nakatan-aw, ug kung masimhot pa siya sa gilay-on nga gikan kaniya, ug—ug siya—wala siya kabalo nga—nga duol na ang maong iro.

<sup>52</sup> Ug dayon, sa pagsakmag sa iro nga kalasanon kaniya, kung abtik gyud siya, mawakli niya kini. Ug, apan kung nagagikan sa kilid ang iro, makasakmag siya og tibuok nga unod sa usa. O, pagsakmag niya sa liog niini usahay, mopaak siya duol sa tutunlan, ug masipyat niini. Ug ang usa, diha sa paglambalamba, malaksi ang usa ka ingkib sa unod gikan sa tutunlan sa maong usa, mosugod na dayon agas ang dugo.

<sup>53</sup> Ug sundan na dayon mismo sa maong iro ang inagian sa nianang nagaas nga dugo, nga ginagukod ang usa. Ug sa diha nga nagakakunhod na ang kinabuhi sa maong usa, sa diha nga ang dugo, nga mao ang agos sa kinabuhi ngadtong lawasa, sa diha nga sugod na kana nga nagakakunhod, nagakaluya na ang usa. Ug ang iro dayon, o ang lobo, anaa na mismo sa luyo sa maong usa.

<sup>54</sup> Karon, kung dili makakita og tubig kana nga usa! Karon, ang tubig aduna’y butang niini, nga, sa dihang makainom na ang usa og tubig, hunongon niini ang pag-agas sa dugo. Apan kung dili siya makakita og tubig aron mabugnawan siya, dayon ang—ang dugo mopadayon og agas nga mas kusog pa; tungod kay nagadagan siya, nga padayon nga nagabomba ang iyang kasingkasing. Apan kung makaabot lang gayud siya sa tubig, mabuhi ang maong usa.

<sup>55</sup> Karon aduna’y usa ka dakung leksyun dinha, kita n’yo, ug ginaingon ni David dinhi, “Ingon nga ang lagsaw nangandoy sa pagpangita sa tubig sa sapa, mao usab ang akong kalag nangandoy sa pagpangita Kanimo, O Dios.”

<sup>56</sup> Karon nasayod kanang maong usa, nga gawas nga makakaplag siya og tubig wala na siya. Dili gayud siya mabuhi. Nasundan ko na sila sa makadaghang higayon human nga masamdan. Pag-nakaabot na siya sa usa ka sapa sa tubig,

molusong siya ug moinom, mosaka sa bungtod; molugsong balik, motabok, moinom sa tubig ug mosaka na. Dili ka na gayud makaapas kaniya, samtang nga nagasubay siya niana nga sapa. Apan pagkabiya na niya niana nga sapa, nga dili na siya makakita og usa pa ka sapa kung asa man, maapas mo na siya dayon. Ug karon nasayod niana ang usa, busa magpabilin siya duol mismo sa tubig, kon diin nga makaadto siya dihadiha dayon. Karon mahulagway mo kaha ang usa ka usa nga nanghinabang na, nga nakaadto siya sa lugar kon diin nga walay tubig?

57 Ug nagaingon siya, “Ingon nga ang lagsaw nangandoy o naghigwaos (mao’y usa ka pagkauhaw) sa pagpangita sa tubig sa kasapaan, mao usab ang akong kalag nangandoy sa pagpangita Kanimo, O Dios. Gawas kon makita ta Ka, Ginoo, mamatay ako. Ako—ako—dili na ako makapadayon pa gawas kon makita ta Ka!” Ug sa diha nga ang usa ka lalaki o babaye, batang lalaki man o batang babaye, nagakauhaw na sa nianang matang nga pagkauhaw alang sa Dios, makakaplag gayud siya og usa ka butang. Kita n’yo?

58 Apan sa diha nga nagaduol kita niini, nga daw sa alang-alang nga pagduol, “Bueno, moluhod ako ug tan-awon kung unsa may buhaton sa Ginoo.” Kita n’yo, dili ka pa gayud nagakauhaw. Kinahanglan usa kini ka pagkauhaw tali sa kamatayon ug Kinabuhi, ug kung ingon-ana aduna’y butang nga magakahitabo.

59 Ang usa, siya usab dinhi. . . Makaplagaan nato nga aduna usab siya og usa pa ka sensya, ang pagpanimhot, nga mao ang nagapaalarma kaniya sa dihang duol na ang iyang kaaway. Nagpanag-iya siya, kining gamay’ng linalang, og usa—usa ka sensya aron mapanalipdan niya ang iyang kaugalingon. Ug siya’y—aduna siya’y usa ka gamay’ng pang-alarma sulod kaniya, usa ka gamay nga butang, nga mogilok sa iyang ilong pagduol na ang kaaway. Masimhot mo ang gilay-on sa kaaway, ug masayran niya nga anaa ka dinha, ug dayon wala na siya. Usahay sa tunga ka milya ang gilay-on, mapanimahoan ka niya ug makaikyasa na, o sa lobo o sa unsa man nga katalagman. Mabati niya kini tungod kay gibuhad siyang ingon niana. Usa siya ka usa, sa kinaiyahan. Ug kana nga sensya sulod kaniya mao’y usa lang sa gihatag sa Dios kaniya, sa mga sensya alang kaniya, aron mabuhi.

60 Ug nahunahunaan ko, ang pagkumpara sa usa diha sa tawo nga ginauhaw sa Dios, sa wala pa moanha ang kaaway. May usa ka butang sa usa ka anak sa Dios, sa diha nga sa makausa natawo na sa Espiritu sa Dios, nakadawat na sa bautismo sa Balaang Espiritu, aduna’y usa ka butang sa maong tawo nga mabantayan ang kaaway. Makapaminaw ka sa usa ka tawo sa diha nga nagahisgot siya sa Kasulatan, ug ginabasa ang Kasulatan ug sulayan isal-ot ang usa ka butang ngadto nianang Kasulatan,

nga supak sa maong Kasulatan, ang usa ka tawo nga puno sa Espiritu Santo mahimong [Ginapapiti ni Igsoong Branham ang iyang tudlo—Ed.] mabantayan kana, mismo dayon. Aduna sa kung unsang butang nga dili mao. Sa dihang makaadto siya sa usa ka lugar, ug—ug ang gamay nianang sensya anaa dinha, gihimo kana aron nga panalipdan ang imong kinabuhi. Kamo, ayaw gayud kamo, ayaw gayud kamo pagtoo sa bisan unsang butang gawas kung eksakto kini sa Pulong sa Dios. Kinahanglan nga mopabilin kamo nga eksakto mismo sa Pulong. Ug, karon, ug luwas kita nga aduna niana nga sensya basta nga anaa kita sa Balaang Espiritu.

<sup>61</sup> Mahimo ninyong basahon, ug sama pananglitan, aduna’y moingon, ug akong basahon sa Marcos 16, ug moingon, “Ug kining mga ilhanan maganunot kanila nga nagatoo: Sa Akong Ngalan pagulaon nila ang mga yawa; magasulti sila og mga bag-ong sinultihan; o makakupot og mga bitin, o makainom og mga butang nga makahilo, dili kini makadaut kanila; kon pandungan nila sa ilang mga kamot ang mga masakiton, mangaayo sila.”

<sup>62</sup> Karon, dayon, makita ninyo ang usa ka tawo nga motindog dinha ug moingon, “Karon, sa panahon pa kana sa mga apostoles.” Niana, karon, dihadhiha mismo, kung nadawat mo na ang Balaang Espiritu, nasangkapan ka na niana nga sensya. Ginatimbrihan kini niini dayon. Aduna sa kung unsa nga sayup dinha. Kita n’yo? Ginapaninguhaan nilang isaysay kini palayo, nga kini alang sa laing panahon, nga dili na ninyo gayud kini kinahanglan nga mga butang sa karon. Apan nag-ingon si Jesus, “Kining mga ilhanan maganunot kanila nga nagatoo.” Kita n’yo, may usa ka gamay’ng butang nga motimbri sa sulod kaninyo, usa ka hagongan, sa pagkahibalo nga sayup kana ug kana ang dalan sa kamatayon.

<sup>63</sup> Tungod kay, nag-ingon si Jesus, “Kung modugang kita og usa ka pulong ngadto Niini, o motaktak og usa ka Pulong gikan Niini, taktakon ang atong bahin gikan sa Libro sa Kinabuhi.” Kita n’yo, dili ni usa man ka Kasulatan. Kinahanglan nga dawaton nato Kini sa ingon lang gayud nga pagkasulat Niini. Ug nagabantay ang Dios sa Iyang Pulong, aron tumanon Kini, ug nasayod kita nga Kini kinahanglan husto gayud.

<sup>64</sup> Mao nga, bisan unsa pay ingnon sa usa ka iglesia, bisan unsa pay ingnon ni kinsa pa man, kung natawo ka na sa Espiritu sa Dios, kabahin ka na sa Biblia. Miingon ang Dios kang Ezequiel, siya, nga propeta. Miingon Siya, “Kuhaa ang basahong-linukot ug kan-a kini,” kung ingon-ana ang propeta ug ang basahong-linukot nahimong kabahin sa usa’g usa. Ug ingon niana ang magtotoo sa pagkadawat niya sa Balaang Espiritu; ang Balaang Espiritu ang nagsulat sa Biblia, ug ang Espiritu sa Dios mao ang Pulong sa Dios. “Ang Akong mga Pulong mao’y Espiritu. Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong

unod ug nagpuyo ipon kanato.” Mga Hebreohanon 13:8, “Siya sa gihapon kagahapon, karon, ug hangtud sa kahangturan.” Ug sa diha nga kabahin ka niana nga Pulong, oh, kung ingon-ana pasagdi nga aduna’y mogawas nga butang nga supak nianang Pulong, [Ginapapiti ni Igsoong Branham ang iyang tudlo—Ed.] may motingog dayon nga usa ka gamay’ng hagonan. Kita n’yo, kini aron nga pasidan-an ka nga padulong na ang kamatayon. Dili gayud nato buhaton kana. Aduna usab . . .

<sup>65</sup> Kini nga mga pagkauhaw natural lang. Natural kini alang sa mga Cristohanon. Natural kini para sa tawo.

<sup>66</sup> Aduna usab og usa ka pagkauhaw sa kalamposan. Daghan kaayong mga tawo karon, kon giunsa nato pag-eskwela alang niining pagkauhaw! Ato lang nahimatikdan, nga gipangaugdan nila ang unibersidad. Ug manggi-eskwela kita didto, ug mogasto og linibo ka mga dolyares ang mga tawo aron ipadala ang ilang mga anak ngadto sa eskwelahan, ug—ug ngadto sa mga unibersidad ug mga kolehiyo, ug uban pa, aron makakuha og edukasyon. “Aron nga magmalampuson,” nga ilang tawag niini, “sa kinabuhi.” Apan karon wala ko’y batok niana, karon, maayo man kana. Apan, alang kanako, mahimong maangkon mo ang tanan nga pagpang-eskwela sa kalibutan, ug dili mo sa gihapon makaplagan ang tinuod nga kalampusan. Husto kana. Tungod kay, lumalabay lang kini nga mohatag kanimog og diyutay nga kahamugaway dinhi. Ug aduna’y . . . Apan pag-namatay ka, biyaan mo kana tanan, ug ang tanan niining panginabuhi nga aduna kita.

<sup>67</sup> Ginaingon ko kini niadtong miaging adlaw, didto sa Phoenix. Maangayon nga isulti ko kini pag-usab, nga, “Tanan niining modernong sibilisasyon, ang maong tibuok programa pang-edukasyon, ang bug-os nga programang siyentipiko, supak kini tanan sa Pulong sa Dios ug sa Iyang kabubut-on.” Ang sibilisasyon tumang gayud . . . Wala na gayud og usa ka sibilisasyon sa kalibutan nga moabot pa, nga sama niini. Usa kini ka tinuis nga sibilisasyon. Nagkaaduna ang Dios og Iyang unang sibilisasyon ibabaw sa yuta, sa dihang gilitok Niya ang Iyang mga Pulong ug nanungha sila, ang matag binhi sumala sa iyang matang niini, ug sa nianang sibilisasyon wala’y kamatayon, balatian, kagulan. Ug karon atong gigamit ang mga butang nga anaa sa siyentipikong kalibutan, nga gipahimutang dinhi aron mapabilin kining tibuok sa gihapon, ug tuison kini ngadto sa kunsang unsang butang, ug nagadala kana og kamatayon.

<sup>68</sup> Sama sa bomba atomika. Wala ako kabalo sa mga pormula sa niining mga butanga, apan mahimong masayup ako sa pagsulti niini. Mogamit sila og uranium, aron pagbulag sa usa—usa ka molekula, ug mobulag ang usa ka molekula ngadto sa mga atom. Unsa may buhaton niini dayon? Mangpapas gayud kini, halos, mangguba gayud kini. Ang tanan nga atong ginabuhat!

69 Mogamit kita og medisina, ibutang *kini* nga pormula sa *niining* pormula, aron tambalan *kini*, ug isulod kini kanato. Ug unsa na'y atong ginabuhat? Aduna kita'y ginadaut nga kung unsa man.

70 Karon inyo na siguro nabasa, nabasa ang sa miaging bulan nga *Reader's Digest*, nga nag-ingon kini nga, "Sa niining kapanahonan nga atong gikapuy-an sa karon, nga, ang batan-ong mga kalalaken-an ug kababayen-an mahimong moabot sa tunga-tungang pangidaron diha sa mga baynte ug baynte-singko pa lang ka tuig ang kagulangon." Hunahunaa kana. Mga batang babaye nga anaa na sa pagka-menopos, ug baynte, baynte-dos ug baynte-tres ka tuig ang kagulangon, anaa na sa tunga-tunga nga pangidaron. Nakita n'yo, unsa may nakapaingon niini, tungod sa niining mga hybrid nga pagkaon ug mga butang nga atong ginakaon. Kita n'yo, tungod sa niining mga butanga, sa pagkaon ug sa—sa kinabuhi nga atong gikinabuhi. Ang mga siyentista ang mao'y naghatud niini kanato, ug, sa pagbuhat niini, ila kamong ginapatay.

71 Atua ako niadto sa Africa kon diin nakita ko silang mga batang lalaki nga wala pa gayud nakainom og usa ka takal sa tambal sa tibuok nilang kinabuhi. Nagakaon sila og karne nga gipang-ulod na. Miinom sila gikan sa usa ka lim-aw nga kon tan-awon mopatay kini og usa ka baka. Ug aduna ako niadto ginapuntirya nga usa ka puntingan sa gilay-on nga duha ka gatus ka yarda, ug dili ko kadto makita nga gigamit ang usa ka pares sa seven-fifty binoculars. Ug nagatindog didto ang usa ka lalaki nga kaedad ko, nga nag-ingon kanako kung asa kadto naigo, nga nakita sa iya mismong mata. Karon, kung ang tanan niining mga modernong kultura aduna may butang nga nahimo . . . Mabati ko nga kung aduna lang ko'y iyang mata ug iyang tiyan, mamahimong usa gayud ako ka baskug nga tawo. Oo.

72 Apan tan-awa, nakita n'yo, mao kana ang siyensya, ang edukasyon, ang sibilisasyon, nga gidaut kita niini. Ginadaut nato ang atong mga kaugalingon. Nagsugod kini didto sa tanaman sa Eden, ug nagapadayon hangtud sa karon. Apan, ang pagkauhaw gayud sa kalampusan!

Dayon, nagakauhaw kita alang sa pagpakigkauban. Nagapangadto kita, gusto nato ang pagpakigkauban.

73 Sama kini sa usa ka batan-ong lalaki ug sa usa ka batan-ong babaye. Karon, dili kini nga dili-kinahanglan o dili (pasabot ko) nga dili-natural alang sa usa ka batan-ong lalaki ug sa usa ka batan-ong babaye ang—ang maghigugmaay sa usa'g usa. Usa kini ka pagkauhaw sa gugma. Sa ila kining edad, ug sila—nahigugma sila sa usa'g usa. Ug dili kini nga dili-natural, usa lang kana ka natural nga butang alang kanila nga buhaton kana.

<sup>74</sup> Karon makita nato nga daghang mga butang, sa kinabuhi nga atong gikinabuhian diha sa natural nga lawas, nga atong gikauhawan. Butang lang kini nga anaa na kanato. Gusto natong buhaton kini, nga wala'y duda nga mabati nato nga kinahanglanon gayud kini. Ug kinahanglanon nga buhaton gayud nato kini.

<sup>75</sup> Makita nato nga pagkadaghang mga kababayen-an, niining panahon, ang ginauhaw sa kaanyag. Karon wala'y usa ka babaye... Natural kini nga butang alang sa usa ka babaye nga uhawon nga mamahimong maanyag. Kana—iyang kinaiyang sugyot kana nga gihatag sa Dios ug—ug ang iyang kaanyag nga gihatag sa Dios kaniya para sa iyang bana. Ug makita nato karon nga gusto sa mga kababayen-an nga mamahimong ingon niana. Nganong ingon man niana? Tungod kay usa gayud kini ka butang nga gihatag sa Dios kaniya. Ug dili sayup alang sa mga babaye nga mamahimong maanyag. Angay silang maingon niana.

<sup>76</sup> Ug, kabalo mo, sila lang ang binuhat nga—nga ang babaye mas matahum kay sa lalaki, sa kaliwat sa tawo. Sa tanang uban pa nga mananap, tan-awa ang—ang baye sa laking baka, ang bayeng usa sa laking usa, ang himungaan sa laking sunoy, ang inahang langgam sa amahang langgam, kanunay mong makita nga dagku ug matahum ang laki. Apan sa kaliwat sa tawo, nagpakita nga dinha miabot ang pagpangtuis, natuis kini; ug nga ang mga babaye mao'y—mao'y matahum, ug nagapaninguha gayud sila aron nga mamahimong matahum.

<sup>77</sup> Dili sa kung unsa niining mga mahilas nga mga linalang nga makita nato diha sa kadalanan niining panahona; dili, dili, dili ingon niana nga matang sa kaanyag. Dili. Kana ang pinakamakalilisang nga talan-awon nga sukad nakita ko sa tibuok kong kinabuhi. Oo, sir. Mao kana ang pagpangtuis nga nagatuis sa matuod nga pagkauhaw.

<sup>78</sup> Karon, ang matuod nga pagkauhaw nga kinahanglan aduna ang usa ka babaye, mao ang “magpatahum sa ilang kaugalingon pinaagi sa pamisti nga maugdang, ug magkaaduna og espiritu nga sama kang Cristo,” Nahaunang Timoteo 2:9. Karon sa ingon nianang paagi kinahanglan uhawon ug babaye. Karon kon gusto mong magpatahum, ingon nianang paagi ang nagapatahum kanimo, kita n'yo, usa ka espiritu nga sama kang Cristo, ug nga napatahum sa maugdang nga pamisti.

<sup>79</sup> Oh, sus, ang pipila sa niining mga tawo sa karon anaa na dinha sa mga kadalanan! Dili mo mailhan ang lalaki sa babaye, ug usa kini ka—pagka-makalilisang kini nga talan-awong butang nga imong... Dili ko, kini—kini'y... Ako—wala pa gayud ko'y nakita og unsa man nga sama niini, ingon nga mga tawo. Lapas na kini sa tawo. Mga mata nga pinintalan nga pataas nga sama *niana*, ug, kabalo na mo, silang kataw-anang



mga mata nga daw sa taluto, ug tanan na niining mga pamisti nga kataw-anan tan-awon. Ug, aba, dili man gani kini... Pagkawala gayud sa porma, nga daw sa dili na gani sila tawo kon tan-awon. Ug ang pipila kanilang mga batang lalaki dinhi, nga pinadamlay nga pagkasudlay ang ilang buhok, nga sama sa ilang igsoong babaye, nga may mga pangkulong sa atubang *dinhi*, kabalo na mo, aba, usa ka tumang pagkatuis kini! Husto kana. Kini—kini—iyaha ni Satanas kini, ug si Satanas mao ang magtutuis.

<sup>80</sup> Sa gihimo sa Dios ang tanan didto sa tanaman sa Eden, pagkamaanindot kadto, dayon misulod si Satanas ug nangtuis. Dili makalalang si Satanas og bisan unsa man. Aduna'y usa lang ka Magbubuhay, ang Dios kana. Apan gituis ni Satanas ang orihinal nga linalang. Ug karon nahimo niya ang (mao kini ang gusto kong hisgotan karong gabhiona) pagtuis sa—sa orihinal nga linalang nga pagkauhaw.

<sup>81</sup> Karon, ang usa ka babaye, sama sa gikaingon ko na sa una, gustong magpatahum. Aduna'y butang diha kaniya, nga babaye gayud siya ug gusto niyang mamahimong ingon niana.

<sup>82</sup> Apan ang kinaiya nga anaa kanila diha sa dalan karon, pinutlan nga buhok nga sama na sa usa ka lalaki, nga nangsul-ob og mga saput nga iya sa mga lalaki; ug nagkabalit-ad usab ang mga lalaki, nga nangsul-ob og mga saput nga iya sa mga babaye, ug mga alut nga sama sa babaye. Kita n'yo, usa kini ka pagpangtuis, ang maong tibuok butang! Ang inyong pagkaon tinuis na. Ang inyong kinabuhi tinuis na. Ang inyong pagkauhaw, tinuis na. Ang inyong pagpangandoy tinuis na. Panahon kini sa pagpangtuis!

<sup>83</sup> Naghisgot ako dinhi, dili pa dugay, bahin sa *Ang Eden Ni Satanas*. Nagkinahanglan ang Dios og unom ka libo ka tuig, ug nahimo ang walay ikasaway nga Eden. Giadtoan ni Satanas ug gipangpugas silang mga binhi, ug gidaut sila. Karon nagkaaduna siya'y unom ka libo ka mga katuigan, ug aduna na siya'y iyang kaugalingon nga siyentipikong Eden, nga balik pag-usab diha sa pagpangtuis sa husto.

<sup>84</sup> Ug kini na ang kapanahonan sa pagpang-hybrid, ang pangpang-hybrid. Nahimo na gani nila ang—ang mga kaiglesihan karon, nga nahimo na ang mga niini og hybrid. Husto kana. Mosulod sila niini, nga nagaadto sila sa simbahan, nga usa na kini ka balay sak-anan imbis nga usa ka simbahan. Ang simbahan usa ka lugar kon diin nagatigum ang mga tawo ug nagasimba sa Dios sa Espiritu ug sa Kamatuoran. Ug usa na kini karon ka balay sak-anan. Mangadto kita didto ug magkaaduna og gamay'ng panahon sa pagpanglamanohay, ug sa pagpakigkauban, ug mangkape didto sa luyo sa bilding, ug manguli na hangtud sa sunod nga semana na usab, ug nangahimo na nato ang relihiyoso natong katungdanan.

<sup>85</sup> Tinuis na kini karon nga kapanahonan. Ug ginatuis ni Satanas kining mga pagkauhaw nga gibutang sa Dios diha kaninyo, sa pagkauhaw. Ginapangtuis ni Satanas ang mga niini. Karon kon gusto ninyong mahibaloan ang husto, ang pagpangtuis. . .

<sup>86</sup> Kung kamo, mga kababayen-an, nga gustong magpatahum, basaha ang Nahaunang Timoteo 2:9, ingon niana kadtong “pagpatahum sa ilang kaugalingon pinaagi sa bisti—pagpangbisti nga maugdang, nga aduna’y espiritu nga sama kang Cristo, maaghup, nagapasakup sa ilang bana,” ug uban pa. Sa ingon nianang paagi kamo kinahanglan mapatahum, ang kinabuhi ninyo nga inyong gikinabuhi.

<sup>87</sup> Iyang ginatuis ang matuod nga kinaiyahan sa Dios, ug ang matuod nga pagkauhaw nga iya sa Dios, sa lawas ug kalag, pinaagi og pagpangibog sa sala. Ang sala, usa ka pagpangtuis! Karon makita nato, sa tawo karon, ang paagi nga ilang gidawat kanang pagpangtuis; ang pagkauhaw sa Dios, ang pagkauhaw aron mamahimong matahum, ug tanan na niining mga pagkauhaw. Ang alang, sa tubig, gihimo na nila kana nga tagbawon kana pinaagi sa pagpanginum. Ang pagkauhaw sa kalipay, gusto sa tanan nga magkaaduna og kalipay; pagkauhaw alang sa pagpakigkauban; tanan na niining dakung mga pagkauhaw nga gibutang diha kanato sa Dios, aron nga mauhaw kita ngadto Kaniya. Gihimo kamo sa Dios aron uhawon gayud Kaniya, ug ginasulayan nato tagbawon kini pinaagi sa kung unsa man nga uban pang matang sa pagkauhaw, sa kung unsang uban pang matang sa pagtuis sa maong hustong pagkauhaw. Nakita ba ninyo kung unsa kini sa natural? Nakita ba ninyo kung unsa kini sa espirituwal? Nagadahum kita, nga samtang nga nagpasakup kita sa iglesia, kana—mao na kana, nga mao lang kana ang kinahanglan natong buhaton. Bueno, sayup gayud kana. Dili.

<sup>88</sup> Gusto sa Dios nga uhawon kamo Kaniya! “Ingon nga ang lagsaw nangandoy sa pagpangita sa tubig sa sapa, mao usab ang akong kalag nangandoy sa pagpangita Kanimo, O Dios.” Kita n’yo? Kita n’yo?

<sup>89</sup> Karon, kung kadtong lagsaw nangandoy sa maong sapa, unsa kaha kung aduna’y moabot, ug usa pa ka usa ang moabot, ug moingon, “Aba, sultihan ta ka kung unsa’y akong—akong mahimong buhaton. Kabalo ko nga aduna’y usa ka lunangan dinhi.” Bueno, dili kana gusto sa usa. Siya, dili kana makahatag kaniya og unsa man nga kaayohan.

<sup>90</sup> Ug wala’y bisan unsa man nga makatagbaw nianang pagkauhaw nga anaa sa tawo, gawas kon misulod na ang Dios. Kinahanglan nga magkaaduna siya Niini, o mamatay. Ug wala’y tawo nga aduna’y katungod nga pahilumon og tagbawon kana nga balaang pagkauhaw, nga anaa sulod kaniya, pinaagi sa

mga butang sa kalibutan. Dili, sir. Dili-diosnon nga buhaton ang ingon niana. Ug kung nagakauhaw ka sa Dios, ayaw pagpakiglaman lang sa magwawali ug ipalista ang imong ngalan sa maong libro. Kung nagakauhaw ka sa Dios, aduna lang usa ka butang aron matagbaw kini, kana'y, ang pagtagbo sa Dios. Kung nagakauhaw ka sa Dios, mao lang kanang paagi nga matagbo mo Siya, ang buhaton kana.

<sup>91</sup> Ug dayon aduna'y dakung katalagman, usab, kung dili ka magbantay kung unsa'y imong ginabuhat nianang higayona. Kung nagakauhaw ka sa Dios, siguradoha nga Dios gayud ang imong nakaplagan. Kita n'yo, siguradoha gayud nga ang imong pagkauhaw ang natagbaw. Apan kung nahimo ni Satanas nga matuis ka, sa niining natural nga mga kagana, ug iya gayud kini buhaton kon mahimo niya, iyang—iya ka gayud papaninguhaon nga matagbaw.

<sup>92</sup> Mogawas ang tawo, unsa man ang nagapadani sa tawo nga moinum? Mao'y tungod nga siya nagkabalaka ug nagkaguol. Aduna'y butang nga kulang kaniya.

<sup>93</sup> Atua ako didto sa Mayo, dinhi dili pa dugay, ug atua ako didto sa usa ka pagpakighinabi. Ug dayon nasulti kini, nga, naestoryahan ang bahin sa pagpanginum, ug gisultihan ko sila nga palainum kaniadto ang akong amahan.

Miingon, “Unsa may nagpadani kaniya nga moinum?”

Ingon ko, “Wala ko kabalo.”

<sup>94</sup> Miingon siya, “Mao'y tungod nga aduna'y butang nga (siya) dili siya matagbaw, ug abi niya nga mahimo siyang moinum aron nga masalikway kini sa iyang hunahuna.”

<sup>95</sup> Nakuha ko kini diha dayon, kita n'yo. Ang Dios kini gayud, ang maong bugtong butang nga makatagbaw nianang pagkauhaw. Ang Dios Mismo ang bugtong butang nga makatagbaw nianang pagkauhaw sa tawo, ang pagdawat sa Dios.

<sup>96</sup> Karon gamiton ni Satanas kining mga butanga, sa gikaingon ko na, ug pangtuison kini. Dayon kung dili mo—kung dili mo . . . Kung dili mo hatagan kana nga pagkauhaw og hustong lugar sa imong kinabuhi, ug nga dili na uhawon ug nga dawaton ang mga butang nga gikatagana sa Dios aron mahunong na kana nga pagkauhaw, aron matagbaw kini, kung ingon-ana dalhon ka ni Satanas ngadto sa pipila sa iyang mga malan-og na nga mga hugawanan niining kalibutana. Magkaaduna ka gayud kon asa man. Kung dili ka makakita og makaon, mokaon ka gikan sa basurahan. Kita n'yo? Ug kung ikaw—kung dili ka makakita og tubig, ug naghimalatyon ka na, moinom ka gayud gikan sa usa—usa ka bisan unsa nga matang sa lim-aw, tungod kay mamatay ka na.

<sup>97</sup> Apan wala’y hinungdan nga maingon niana, sa dihang nagakauhaw ka sa Dios, tungod kay ang Dios usa ka buhi nga Dios, dili sa kung unsa man nga butang sa kasaysayan. “Ginauhaw Kanimo ang akong kalag, buhi nga Dios,” Usa ka Butang nga nagahatag og buhi nga tubig, Usa ka Butang nga nagahatag og katagbawan.

<sup>98</sup> Aduna’y usa pa ka kinaiyahan, nga natural, nga usa gayud ka natural nga pagkauhaw, ang kanang natural nga pagkauhaw nga iya sa kalag. Mahimong moingon ka, “Igsoong Branham, kana ba nga pagkauhaw nga iya sa kalag, natural ba kana?” Oo, natural kana sa kalag nga uhawon. Ug kini, kay gihimo ka sa Dios nga ingon niini, aron nga sa ingon niana uhawon ka alang Kaniya. Gusto Niyang uhawon ka alang Kaniya. Karon, gihimo ka nga ingon niana sa Dios. Dili kinahanglan nga himoon ka Niyang ingon niana, apan Iya gayud gibuhat kini. Ug kung wala ka pa Niya gibuhat nga ingon niana, aron nga uhawon ka, magkaaduna’y pasumangil didto sa Hukmanan, moingon, “Ako—ako—wala man gayud ako giuhaw sa Dios.” Apan, wala’y pasumangil, nagkauhaw ka gayud. Medyo kini ipasumangil mo; mahimong ipasumangil mo ang imong asawa, mahimong ipasumangil mo ang imong awto, mahimong ipasumangil mo ang uban pang butang, mahimong moadto ka sa simbahan ug sulayan nga tagbawon kini. Ug wala ako’y bisan unsa man nga batok sa pag-adto sa simbahan, apan dili kana ang katagbawan. Kini mao ang makaplagan gayud ang Dios, ang buhi nga Dios, ang Dios sa Langit, sa imong kalag, nga nagatagbaw nianang pagpangandoy ug pagkauhaw nga imong ginapangandoy.

<sup>99</sup> Karon, kay, gihimo ka Niyang ingon niana aron nga uhawon ka Kaniya, alang sa Iyang pagpakigkauban. Karon, aduna’y tinuod nga pagkauhaw sa pagpakigkauban. Karon gusto natong magkitaay ang usa’g usa. Ginabuhat nato kana karong gabhiona. Nagakatigum kita dinhi karong gabhiona tungod kay gusto nato ang pagpakigkauban, sa usa’g usa. Ngano man nga ginabuhat nato kana? Tungod kay aduna’y butang kanato nga gusto nato nga magkitaay ang usa’g usa. Natural lang kana. Ug karon nagakatigum kita sa usa ka magkaparehong katuyoan dinhi, mao kana, tungod kay ginauhaw kita sa Dios. Kita n’yo? Ug dayon nagakatigum kita dinhi niini sa regular, magkaparehong katuyoan dinhi sa pagpakigkauban. Sa simbahan karong gabhiona, dinhi, mahimong daghang nagkalain-laing mga panan-aw pangdenominasyon, ug uban pa; apan paghisgotan na kana nga pagkauhaw, mahimo kitang magkitaay diha sa usa ka magkaparehong katuyoan, usa ka katuyoan: ginauhaw kitang tanan. Mahimo nga ang uban nagatoo sa pagwisik-wisik, ang laing usa diha sa pagbautismo, ug ang usa sa pagbubo, o uban pa; apan paghisgotan na ang pagkauhaw ngadto sa Dios, kita—nagakatigum kita base sa usa ka kaparehong katuyoan. Ug gibuhat kita sa Dios nga ingon

niana aron nga buhaton nato kana, ang uhawon Kaniya ug sa Iyang pagpakigkauban. Wala ko'y uban pang nahibaloan. . .

<sup>100</sup> Sa usa pa ako ka gamay nga batang lalaki, nahinumduman ko nga midaku ako sa usa ka kabus kaayo nga pamilya. Ug akong mahinumduman ang makadaghang higayon nga mogawas ako kauban ang akong mga amigo. Dili ako makapamisti sama sa moadto sa usa ka desente nga lugar. Apan, ako—wala ko kabalo, nga aduna'y butang diha sa mga tawo, nga gusto ko. Gusto kong makig-uban kanila. Apan ako niadto, kapin kun kulang, gitawag, nga carnerong itum. Ug sa naluwas na ako ug nakaplagan nga ang Usa ka Butang sulod kanako, nga akong gikauhawan, usa—usa ka Higala, Usa nga mamahimong kakuyog ko, Usa nga mahimo kong saligan, Usa nga maminaw ug maestoryahan mo sa imong mga problema. Ug sa dihang. . . Nakaplagan ko kana nga tinuod og matuod nga katagbawan sa dihang nakaplagan ko si Jesus Cristo, kanang tinuod og matuod nga Magtatagbaw nga ginatangtang ang tanan—tanang. . . ginatagbaw ang tanan nianang kauhaw, ug ginahatag kanimo ang Usa ka Butang nga—nga wala na gayud bisa'g unsa pa man nga makapuli sa Iyang lugar.

<sup>101</sup> Ug kung giunsa karon ni Satanas pagpaninguha sa pagtuis niining pagpatagbaw sa kalag, nianang pagkauhaw alang sa kalag! Ginapaninguhaan niyang ihatag kanimo ang tanan aron matagbaw kini. Ug pagkamalimbongon niya gayud niining mga adlaw sa pagpanuis. Usa kini ka tinuis nga kalibutan. Usa kini ka tinuis nga kaliwatan. Usa kini ka tinuis nga katawhan. Ang tanan-tanan tinuis, ug hinayhinay nga gituis hangtud nga nahimo na kini nga pinakalimbongan nga kapanahonan nga atong. . . nga sukad gayud gikapuy-an sa tawo. Mas malimbongon gayud kini kay sa una.

<sup>102</sup> Karon imo gayud—dili mo gayud mahulagway kung giunsa na pagkahimong malimbongon ang nasud, bisan sa ato mismong mga kaigsoonan, sama sa mga Amerikanong lungsuranon.

<sup>103</sup> May gihisgotan ako niadto dili pa dugay. Atua ako sa mga kakahoyan pipila ka mga semana ang milabay ug may nakita nga usa—usa—usa ka pakete sa sigarilyo nga napahimutang didto sa kakahoyan. Ug nag-ingon kini didto, “Ang pangsala sa usa ka tawo nga nagahunahuna.” Ug mipadayon ako sa mga kakahoyan sa ginagmay'ng lakang, ug mibalik ako; nga kanunay kong gihunahuna, “Ang pangsala sa usa ka tawo nga nagahunahuna, ug ang pangtilaw sa usa ka tawo nga nagapanigarilyo.”

<sup>104</sup> Bueno, atua ako niadto sa World Fair, pipila na ka tuig ang milabay, mahinumduman ninyo niadto nga nakuha nila kadtong Yul Brynner ug tanan na sila didto, sa dihang nagpakita sila og mga demonstrasyon bahin sa sigarilyo. Ug kung giunsa nga gikuha nila kadtong aso ug gibutang kini diha sa usa ka marmol, ug mikuha og Q-tip ug gikagis ang nicotine didto, ug gibutang

kadto sa likod sa usa ka ilaga. Sulod sa pito ka adlaw, pagkadaku na sa iyang kanser nga dili na siya makatindog. Kita n'yo, gumikan sa usa ka sigarilyo! Ug dayon gipakita nila kung giunsa nga sa diha nga mosulod na kana sa baga sa tawo. Ang uban kanila moingon, “Wala ko man ginahanggab. Ginapabulhot ko lang kini sa akong baba.” Gipakita kung ginaunsa niini pag-adto sa laway ug nagapanaug ra gihapon mismo, ngadto sa tutunlan, kita n'yo.

<sup>105</sup> Ug dayon kining tawhana miingon, “Nakita n'yo nga daghan kaayong mga estorya bahin sa pangsala.” Ingon niya, “Karon, kung aduna kamo'y pangandoy,” aduna'y pagkauhaw, nakita n'yo, “usa ka pangandoy sa pagpanigarilyo, mahimong matagbaw kana nga pangandoy sa usa ka natural nga sigarilyo sa kadali. Apan kung aduna kamo'y usa ka pangsala, gikinahanglan niini og upat ka sigarilyo aron matagbaw,” ingon pa, “tungod kay mga ikaupat nga bahin lang sa aso ang makuha ninyo.”

<sup>106</sup> Ug miingon, “Ang pangtilaw sa usa ka tawo nga nagapanigarilyo”? Kita n'yo, dili ka magkaaduna og aso gawas kung aduna'y tar. Ug pag-aduna ka na'y tar, aduna ka na'y kanser. Busa tan-awa, kita n'yo, kini—usa lang kini ka gimik. Ug nahunahuna ko ang bahin sa usa—usa ka kompanya sa sigarilyo nga ania niining nasud, ug—ug nabuhi kini pinaagi niini nga nasud, ug dayon nga may gimik nga ingon niana, aron bug-os nga limbongan ang mga Amerikanong lungsuranon, nga limbongan sila. Pangsala sa usa ka tawo nga nagahunahuna? Usa lang kini ka gimik aron makabaligya og daghan pang mga sigarilyo.

<sup>107</sup> Dayon nahunahunaan ko ang bahin nianang butanga, “Pangsala sa tawo nga nagahunahuna,” nahunahunaan ko, “usa kana ka maayong idiya.” Busa aduna'y Pangsala ang tawo nga nagahunahuna, kana mao kining Biblia. Usa—usa ka pangsala sa tawo nga nagahunahuna nga mogamit niining Pangsala, magapamunga kini og pangtilaw nga iya sa tawo nga matarung. Kita n'yo?

<sup>108</sup> Karon, wala ka'y mabira nga sala sa mga panid niining Biblia. Wala, ginababagan kini Niini. Ginasala kini Niini. Karon, mahimo kang moadto sa simbahan, ug buhaton ang bisan unsa man, apan dili ka makasulod pinaagi niining Biblia ug nga aduna'y sala. Dili kini tugotan Niini. Ginasala Niini ang tanang sala, ug nagahatag Kini og pangtilaw nga iya sa Balaan nga tawo. Tungod kay kung ang tawo nagahunahuna nga gusto niyang mamahimong balaan, ug mamahimong sama sa Dios, ug mamahimong usa ka anak nga lalaki o usa ka anak nga babaye sa Dios, kung ingon-ana gusto niya ang hustong matang sa Pangsala. Busa ginababagan Niya ang sala sa niining dapit sa Biblia, ug mahimo Niya lang mahatud pinaagi sa Biblia ang Balaang Espiritu, nga mao'y nagsulat sa Biblia. Pangtilaw kini

sa usa ka balaan nga tawo, ang magkaaduna niining Pangsala sa nagahunahuna nga tawo.

<sup>109</sup> Karon makita nato kung unsa na ka malimbongon kini sa karon. Mateo 24:24, nag-ingon si Jesus, “Sa ulahing mga adlaw, nga, ang maong duha ka espiritu mamahimong halos magkapareho na gayud hangtud nga ipahisalaag nila ang Pinili mismo kung arang mahimo.” Daw sa unsa ka halos magkapareho na! Giunsa, daw sa unsa nga pagpanglimbong sa—sa matarung ug kadautan, nga aduna kita karon!

<sup>110</sup> Bisan pa sa atong—sa atong gobyerno, sa atong pulitika, kita—wala gani kita og usa ka tawo nga mahimong ibutang ingon nga usa ka pulitiko, nga mobarug gayud sa kung unsa’y ginahunahuna niya nga husto. Asa na ang atong mga Patrick Henry ug George Washington, ug mga Abraham Lincoln sa karong panahona? Sama lang sa giingon sa atong Presidente didto, “Ang paagi, kung gusto nila ang komunismo, maangkon nila kini, unsa pa man ang gusto sa mga tawo.” Kung dili pa kaha kana og usa—usa ka lalaking ayaw ipahayag ang iyang kunbiksyon! Ang usa ka lalaki mobarug diha sa usa ka prinsipyo, nga mobarug gayud sa kung unsa ang prinsipyo. . . nga gusto lang mobarug sa—sa—sa kon diin gamay lang ang mobatok.

<sup>111</sup> Ug ingon niana ang pamaagi nga aduna na ang mga tawo, sa iglesia. Gusto nilang magpamiyembro sa iglesia, ug moingon sila, “Oh, bueno, kana—mao na kana, ako—nagpamiyembro na ako sa iglesia karon.” Ginapaninguhaan ninyong tagbawon kanang balaan nga kauhaw nga gibutang sa Dios diha kaninyo, kanang Toreng nagakontrola nga nagapaningkamot sa pagdala kaninyo ngadto sa hustong butang, ug inyong gipanguhaan nga tagbawon kini pinaagi sa pagpamiyembro sa usa ka iglesia, sa pag-asoy-asoy og usa ka kredo, o butang nga sama niana. Sa dihang, kini wala na’y uban pa kondili ang Presensiya mismo ug pagpuno sa Dios Mismo sa inyong kinabuhi, nga mao ang magtagbaw niana.

<sup>112</sup> Dili Siya matagbaw pinaagi sa usa ka kredo. Wala gayud kamo mabira nga kredo gikan nianang Biblia. Wala gani bisan pa nga Kredo sa mga Apostoles, nga mao’y tawag kuno, dili gayud magagikan Dinha. Pakitai ko diha sa Biblia kon diin nagaingon sa Kredo sa mga Apostoles, “Nagatoo ako sa Balaang Romano Katoliko nga iglesia; nagatoo ako sa kaambitan sa mga santos”; sa dihang nag-ingon ang Biblia, “Aduna’y usa ra ka maglalaban taliwala sa Dios ug sa tawo, ug mao kana ang Tawong si Cristo Jesus.” Wala gayud kamo mabira nga ingon niana sa Biblia.

<sup>113</sup> Wala gayud kamo mabira og tanan niining mga sayaw-sayaw, ug mga syort, ug mga butang nga ginapanghimo sa mga tawo karon, niining mga twist ug mga watusi, ug tanan na niining mga butang, gikan sa Pulong sa Dios. Wala gayud kamo’y

mabira og niining modernong dagan sa sibilisasyon gikan nianang Biblia. Supak Kini niini. Kita n'yo? Ug paninguhaon pa ninyong tagbawon kana nga pagkauhaw, apan, makita n'yo, kini. . . Tagbawon lamang niining Biblia ang pangtilaw sa usa ka matarung nga lalaki o babaye. Kining Balaang Espiritu, nga ilang ginakataw-an, ug miingon, “Wala ka na sa imong pangutok.” Apan Kana ang nagatagbaw nianang pagpangandoy, kanang usa ka butang nga ang kalibutan wala gyu'y hibangkaagan. Ilang gipangtuis ang ilang mga kaugalingon, gikan sa matuod nga bautismo sa Balaang Espiritu ug sa Pulong sa Dios, (ngadto sa unsa?) ngadto sa mga hugawanan, sa hugawanan sa iglesia, sa mga dogma ug mga kredo, ug—ug mga pang-denominasyon nga paglahi-lahi, ug uban pa.

Ingnon mo, “Cristohanon ka ba?”

114 “Methodist ako. Baptist ako. Presbyterian ako.” Wala kana'y ni usa man ka kabilinggan sa Dios, ni usa man ka butang. Wala kamo'y mabira nianang mga butanga gikan dinhi sa Biblia sa Dios. Ug ginapaninguhaan ninyong tagbawon kana nga balaang pagkauhaw nga gihatag kaninyo sa Dios, aron nga uhawon ngadto Kaniya. Husto ba kana? [Nagaingon ang kongregasyon, “Amen.”—Ed.]

115 Karon, kabalo kamo nga nag-ingon si David dinhi, “sa buhi nga Dios.” Karon, “sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato.” Kung ingon-ana wala gayu'y katagbawan hangtud kini nga Pulong, nga mao ang Dios, nahimong buhi diha kaninyo, dayon makita na ninyo ang Dios Mismo nga ginatuman ang mga saad nga Iyang gipangsaad diha sa Biblia.

116 Karon aduna kita'y nagkalain-laing mga maghuhubad sa Biblia. Ang usa ka iglesia hubaron Kini sa *ingon niining* paagi, ang usa pa hubaron Kini sa *ingon nianang* paagi, ug ang usa pa sa *ingon niining* paagi. Ang uban dili mangtaktak kondili gamay lang gayud Niini, ang uban motaktak *dinhi* ug *dinha*, usa ka tipik Niini. Apan ang Dios ang Kaugalingon Niya Mismo mao ang Maghuhubad. Sa dihang nagsaad Siya ug gituman kini, mao na kana mismo ang hubad niini.

117 Kung gisaad ko kaninyo nga maania ako karong gabhiona, ug ania ako, mao na kana ang katumanan sa akong saad. Kung ingnon ko nga tagbuon ko kamo sa buntag, ug maatua ako didto, mao na kana ang akong saad. Dili na kinahanglan ang pagbuhat og unsa man nga uban pang pagpasumangil, kinahanglan nga maatua gayud ako didto.

118 Ug sa diha nga nagasaad ang Dios, ug dayon moabot ug ginatuman kana nga saad, mao na kana ang hubad sa maong saad. Ug hagiton ko ang si kinsa man nga toohan ang Dios sa



Iyang Pulong, ug tan-awon kung ang matag Pulong diha nianang Biblia dili ba ang Kamatuoran. Husto kana. Mao kana kung unsa nga kanang pagkauhaw anaa dinha.

119 Moingon ka, “Kung buhi lang ako unta niadtong mga adlaw ni Jesus, gibuhat ko unta ang *ingon niini-ug-ingon niana*.”

120 Aba, nagakinabuhi ka man sa Iyang mga adlaw. Unsa ma’y atong ginabuhat bahin niini? Unsa na ma’y atong ginabuhat? Moingon ka, “Bueno?” Kung unsa may nabuhat mo, tingali mao kon unsay gibuhat sa mga Fariseo. Sakup sila niadto sa iglesia, ug nga gisalikway si Jesus Cristo.

121 Kanunay kita nagaingon karong panahona, paningkamotan ingnon sa mga tawo, “Ginakumpara namo. Kinahanglan nga pinanid natong ikumpara ang Biblia sa Biblia, Kasulatan sa Kasulatan.” Dili kana ang Kamatuoran. Dili, dili kini ang Kamatuoran. “Kining Griyegong pulong nagkahulogan *niini*, ug *kini* nagkahulogan *niana*.” Silang mga Griyego mismo, kaniadto pa sa Konseho sa Nicaea, ug silang mga manunulat kaniadto, nagkalain-lain silang mga pagpangkahulogan. Mitoo ang usa niining paagi, *kining* Griyegong iskolar nagpasabot og *ingon niini*, ug ang laing usa nag-ingon nga *kining* usa nagpasabot og *ingon niini*. Ug naglantugiyay sila bahin Niini. Wala kita nagkinahanglan og paghubad sa mga Griyegong iskolar og pang-Griyego man nga mga Pulong.

122 “Ang pag-ila Kaniya mao’y Kinabuhi,” ang Persona, si Cristo Mismo! Dili ang pagkumpara-kumpara. Usa kini ka pinadayag nga mao’y gitukoran sa Dios sa Iyang Iglesia. Ug kung dili kita motukod ibabaw nianang mao rang Iglesia. . . Ang Biblia nag-ingon, “Si Abel, pinaagi og pagtoo!” Ug ang pagtoo usa ka pinadayag gikan sa Dios. Kita n’yo, ang pagtoo usa ka pinadayag gikan sa Dios. Bueno. Ang tibuok niining Butang gitukod sa pinadayag kung ingon-ana, ug gawas kon kini nahipadayag kanimong! Nag-ingon si Jesus, “Nagapasalamat Ako Kanimong, Amahan, nga Ikaw naglilong niining mga butanga gikan sa mga maalam niining kalibutan, ug gipadayag kini ngadto sa mga bata ingon nga makakat-on.” Kita n’yo, karon, ang maong tibuok butang gitukod dinha, kinahanglan mong maila ang maong Persona!

123 Ug dili mo matagbaw kana pinaagi sa pagpamiyembro sa iglesia. Kinahanglan mong makaplagan ang maong Persona, ang Dios Mismo, nga mao ang Pulong ug—ug ang interpretasyon sa Iyang Kaugalingon sa karong panahon, ang mga saad nga Iyang gisaad sa karong panahon. Ang mga tawo nga magkaaduna Siya sa karong panahon, “ang Iglesia nga wala’y buling o kunot,” dili nagkahulogan nga usa ka denominasyon; nagkahulogan kini og mga tawo, ang matag usa nga mga wala’y buling o kunot. “May duha ka tawo sa higdaanan, pagakuhaon Ko ang usa ug biyaan ang usa; may duha ka tawo sa kapatagan, pagakuhaon Ko

ang usa ug biyaan ang usa.” Apan sa dihang ang Dios, nianang pagkauhaw nga aron mahisama Kaniya, ug dayon makita mo nga ang Iyang Pulong anaa kanimo, nga ginapamatud-an ang Kaugalingon Niini, nga ikaw usa ka alagad sa Dios. Nga ang bisan unsa man nga ginasulti sa Dios, ginatuman mo gayud kini, kung ingon-ana nagaagi ka na sa hustong proseso aron matagbaw kana nianang balaang pagkauhaw nga anaa kanimo.

<sup>124</sup> Oh, siyempre, pagakataw-an ka sa mga tawo, ug moingon, “Wala ka na sa imong pangutok. Nabuang ka na.” Apan hinumdumi kung asa sila nagainom, kita n’yo. Tan-awa kung asa na sila. Mahulagway mo ba ang usa ka dakung tuboran nga nagapabugwak ug limpyong tubig, ug aduna’y tawo didto sa usa sa kadtong mga lim-aw didto dapit, nga may mga patay nang mga pitopito, ug mga kredo, tanan na nga anaa sulod niini, nga nagainom didto, nagahangad ug nagabiaybiay kanimo? Oh! Aba, wala siya kabalo, wala siya kabalo kung daw sa unsa—kung daw sa unsa ka makapatagbaw-sa-kauhaw nga Sapa ang imong ginapuy-an. Husto gayud kana.

<sup>125</sup> Aduna kita’y buhi nga Dios. Dili usa nga namatay na diese-nuebe ka gatus ka tuig ang milabay ug nagpabilin sa lubnganan, kondili Usa nga nabanhaw. Mga Hebreohanon 13:8, nagaingon, “Siya mao sa gihapon kagahapon, karon, ug hangtud sa kahangturan.” Ang mao rang Espiritu Santo nga mikanaug niadtong Adlaw sa Pentecostes ang mao sa gihapong Espiritu Santo nga ania dinhi karon. Siya ang Bahin nga nagahatag og katagbawan, tungod kay Siya mao ang Pulong. Husto kana. Ang Balaang Espiritu ang mao’y nagsulat sa Pulong, Siya ang nagahubad sa Pulong. Nag-ingon ang Biblia, diha sa Ikaduhang Pedro, nga ang Balaang Espiritu ang mao’y nagsulat sa Biblia, “Kaniadtong mga tawo, nga minandoan sa Espiritu Santo, misulat sa Biblia.”

<sup>126</sup> Karon, dili mo kini mahimo, dili mo matagbaw kana nga balaang pagkauhaw pinaagi og bisan unsa man kondili ang Dios Mismo nga nagapuyo diha kanimo, sa Persona sa Balaang Espiritu. Ang edukasyon, kultura, pagpamiyembro sa iglesia, pag-asoy-asoy sa kredo, ang mahisakup sa usa ka panagtipun; maayo man kaayo ang tanan niining mga butanga, apan dili gayud nila mapahunong ang kanang balaan nga pagkauhaw, kanang—kana nga balaang pagkauhaw, diay, dili makapahunong nianang balaang pagkauhaw.

<sup>127</sup> Nagapaminaw ako niadto kang Billy Graham, ang bantugang ebangelista, sa miaging gabii. Sultihan ko kamo, mas labi pa ang pag-ampo ko karon alang kaniya kay sa kaniadto. Nakita ko siya nga ginapangsaway gayud sila, sa mga ginahimo nila. Miingon siya, “Kanang maong pundok sa mga ministro nga nagalakaw sa dalan, nga pinabaliskad ang mga kuwelyo!” Moadto didto kon diin wala man sila’y labot, nga nagapanghilabot sa usa ka butang. Apan nagalakaw sila diha sa

dalan, [Nagapakpak si Igsoong Branham sa iyang kamot—Ed.] nga ginapakpak ang ilang mga kamot ug nga ginaundak-undak ang ilang tiil. Bueno, daw sa mga unholy-roller sila. Karon, nakita n'yo, apan aduna sila'y usa ka butang nga ila—ilang ginatoohan. Aduna sila'y usa ka butang, ginapahinam niini ang kalag. Aduna sila'y usa ka butang nga nagapahinam kanila. Usa ka babaye ang miadto ug gisuksok ang iyang ulo sa kung unsang butang didto, ug gipakaingon nila siyang usa na ka martir, ug nga wala siya'y kahilambigitan nga maingon niana. Karon kini nga mga tawo nahibaloan nato [Ginapakpak ni Igsoong Branham ang iyang mga kamot] aduna'y butang nga makapakpak sila sa ilang mga kamot. Malipayon sila. Aduna butang nga ilang ginabuhat.

<sup>128</sup> Bueno, kung mahimong buhaton mo kana alang sa usa—usa ka prinsipyo nga ginahinahunahuna mong husto dinhi; ug dayon motindog sa simbahan ug aduna'y mopakpak sa ilang mga kamot o moundak-undak sa ilang tiil, giyahan sila sa mga diyakono pagawas sa pultahan. Kita n'yo, gipaliso nila ang ilang mga tawo paingon ngadto sa hugawanan nga mga kredo ug denominasyon, imbis nga pakan-on sila diha sa gipanalanginan nga balaang Pulong sa Dios, nga gihatud pinaagi sa Gahum sa pagkabanhaw ni Jesus Cristo.

<sup>129</sup> Kita n'yo, ginapaningkamotan nila, tagbawon nila ang ilang kauhaw sa pag-ingon, “Ako si Doktor *Ingon ani-ug-ingon ana,*” o mohuman sa usa ka seminaryo o usa ka eskwelahan. Apan wala kana nagkahulogan og usa man ka butang, ni usa man ka butang. Apan, nakita n'yo, sila, ginapaningkamotan nilang tagbawon ang ilang mga kaugalingon, nga moingon, “Karon pagailhon ako sa Dios kay pastor man Niya ako. Pagailhon ako sa Dios tungod kay ako si balaang Amahang *Ingon ani-ug-ingon ana,* o si Obispong *Ingon ani-ug-ingon ana,*” o—o butang nga sama niana. Ginapaningkamotan nilang tagbawon ang ilang pagkauhaw dinha, sa dihang dili mo kini mahimo. “Aduna ko'y Ph.D., LL.D. Aduna ako'y Bachelor of Art. Aduna ako niini.” Maayo man kana. Apan, alang kanako, nagapasabot lang kana nga ingon na niana ka kalayo gikan sa Dios. Husto kana. Ingon na niana ka kalayo gikan sa Dios, sa padayon nga padayon!

<sup>130</sup> Maila mo lang ang Dios pinaagi og kasinatian. Dili mo Kini mahimong eskwelahan. Natawo kang anaa na Kini kanimo! Usa Kini ka butang nga gikahatag sa Dios kanimo. Wala'y kalambigitan Niini ang edukasyon. Ang usa sa pinakabantugan nga tawo sa Biblia dili gani makasulat sa iyang ngalan, si San Pedro. Husto gayud kana, siya ug si Juan, miingon ang Biblia, “Pareho silang wala'y hibangkaagan ug wala'y nakat-onan.” Apan nahimuut si Jesus nga ihatag kaniya ang mga yawi sa Gingharian, tungod kay nagkauhaw siya sa Dios. Amen. Nagakauhaw sa Dios, sa pagpakigkauban. Oo, sir. Oh, sus!

<sup>131</sup> Nahunahunaan ko si Isaias, ang kadtong batan-ong lalaki, oh, usa ka maayong batan-ong lalaki, atua siya didto sa templo, usa niana ka adlaw.

<sup>132</sup> Ang gamhanang hari, ug iya siyang ginatamud ug sa hunahuna niya nga ang maong hari usa niadto sa mga pinakahalangdong tawo. Nga, usa gayud siya ka halangdon nga tawo. Pinadaku siya, sa maayo kaayong mga ginikanan, usa ka maayong inahan ug amahan. Apan sa migawas siya, malimpyo ang iyang mga pagdumala, ug naghimo siya og mga butang nga matarung sa Dios. Ug gitan-aw siya ni Isaias ug gihunahuna nga usa gayud siya ka halangdong tawo, gihimo siya nga usa ka ehemplo. Apan ayaw (gayud) himoa ang tawo, gawas sa Tawong si Cristo Jesus, ingon nga imong Ehemplo. Mapakyas ang tanang tawo. Wala magdugay, miabot siya sa usa ka punto; siya niadto—siya niadto ang hari, apan gisulayan niyang pulihan ang pari ug misulod sa templo, ug gihampak siya og sanla.

<sup>133</sup> Dayon nabalaka gayud si Isaias, busa miadto siya sa templo ug misugod siya sa—sa pag-ampo, nahunahunaan niyang moadto siya ug moampo sa kadali. Ug karon, tan-awa, usa ka propeta kadto nga tawo; apan didto dapit sa templo aduna ang usa ka batan-ong lalaki, nagtuaw siya sa Dios, usa niana ka adlaw, ug miabot kaniya ang usa ka panan-awon. Ug pagkahitabo niadto, iyang nakita ang mga Manolunda, mga Querubin, nga gitabonan ang Ilang mga nawong sa Ilang—sa Ilang mga pako, ug gitabonan ang Ilang tiil, ug nga nagalupad pinaagi sa duruha ka mga pako. Ug pabalik-balik Sila, pasaka ug panaug sa templo, nga nagatuaw, “Balaan, balaan, balaan ang Ginoong Dios nga Makagagahum sa tanan.”

<sup>134</sup> Ug si Isaias, sa dakung kauhaw nga aduna siya niadto, siya—tingali nakaeswela siya. Siya—nagkaaduna siya malagmit og maayong edukasyon. Aduna siya’y usa—usa ka talagsaong panabot bahin sa kung unsa gayud ang Dios. Iyang—nadungog na niya ang mga pari. Dugay na siya sa templo. Napadaku siya nga usa—usa ka magtotoo, apan, nakita n’yo, wala pa gayud niya Kini nakita nga atbangay sa una. Kita n’yo? Siya—aduna siya’y tinguha sa paghimo og matarung. Gusto niya nga mahimong matarung, apan pang-edukasyon lang nga bahin ang ana kaniya. Aduna kaniya ang pang-teolohiya nga bahin Niini.

<sup>135</sup> Apan sa nakaadto siya didto sa templo niadtong adlaw, ug nakita niya kining mga Querubin nga paadto-paanhi nga ginakapa-kapa ang ilang mga pako, ug naamgo nga kini nga mga Manolunda nag-alagad sa atubangan sa Dios. Ug Sila nga mga Manolunda wala gani makaila kung unsa ang sala, ug, nga maatua sa Presensiya sa Dios, nga gikinahanglan Nilang tabonan ang balaan Nilang mga nawong, aron nga maatua sa Presensiya sa Dios. Dayon mituaw ang kadtong propeta, “Alaut ako, kay ako usa ka tawo nga mahugaw og mga ngabil. Ang tanan kong mga teolohiya, teolohiya ug ingon-

anang mga butanga nga nakat-onan ko, tanan kong talagsaong panabot nga nagkaaduna ako mahitungod sa Dios, atbangay kong nakita kini karon.” Miingon siya, “Usa ako ka tawo nga mahugaw og mga ngabil, ug nagapuyo ako kauban sa mga tawo nga mahugaw og mga ngabil.” Ang tanan na nilang mga pagpanudlo sa mga kasugoan, ug mga butang nga ila nang nahimo, wala gayud midangat niadtong maong lugar kon diin nakaadto siya ngadto sa Presensiya sa Dios, ug nakita ang Dios sa kaugalingon niya mismong mga mata; ug ang Iyang dalan, sa didto Siya nagalingkod sa Kahitas-an, sa Kalangitan. Ug atua siya, atbangay nga makita ang realidad. Ug mituaw siya, “Usa ako ka tawo nga mahugaw og mga ngabil, ug nagapuyo ako taliwala sa mahugaw’ng mga tawo.”

<sup>136</sup> Dayon ang Querubin kadto ang mao’y nagkuha sa mga kumpit, ug sa usa ka Kalayo nga carbon gikan sa halaran, ug gihikap kadtong mahugaw nga mga ngabil. Ug giusab siya gikan sa pagkatalawan, o gikan sa usa ka edukadong tawo, usa ka magtutudlo, ngadto sa pagkapropeta kon diin makasulti na ang Pulong sa Dios. Sigurado, nga samtang atua siya sa Presensiya sa Dios, usa ka butang Kadto nga lahi gayud. Kadtong pagkauhaw nga nagkaaduna siya, midangat niadtong lugara dayon, hangtud nga gipuno siya Niini.

<sup>137</sup> Ug tugoti kong sultihan ka, higala, dili ko igsapayan kung unsa pa ka daghan nga kaiglesiahan ang imong gipamiyembrohan, kung unsa pa ka daghan nga ngalan ang imong napalista, asa man nga direksyon ka paingon, ug kung giwisik-wisikan ka man, gibautismohan, o unsa man ikaw; gawas kung natagbo mo na kanang maong Persona, si Jesus Cristo! Kana, mao lang kana ang bugtong butang nga makatagbaw gayud.

<sup>138</sup> Dili kini mabuhat sa emosyon; mahimo kang molukso-lukso ug mosinggiti kutob sa gusto mo, o mahimong modagan ka pasaka panaug sa entablado, ug makasulti ka og nagkalain-laing mga sinultihan nga kutob sa gusto mo. Ug balaan ug maayo silang mga butang. Wala ako nagaingon—wala ako nagaingon og unsa man nga batok niana. Apan gawas kung matagbo mo kana nga Persona, kanang Bahin nga nagahatag katagbawan, kanang Butang nga mopuno sa matag kaugat-ugatan sa imong lawas; dili pinaagi sa emosyon, kondili pinaagi sa usa ka pagtagbaw!

<sup>139</sup> Makakita ako sa una og gamay’ng karatula, nag-ingon, “Kung ginauhaw ka, ingna Parfay.” Aduna sa una og gamay nga mainom, sa batan-on pa ako, nga gitawag og Parfay. Mahinumduman ko nga samtang nagalakaw ako niadto sa dalan, oh, gikan sa pagpamingwit, gikan ako niadto sa sapa, daan nang malang-og nga tubig. Ug daw sa mamatay na ako niadto sa kagutom, ug nakita ko ang karatula nga nagaingon, “Kung ginauhaw ka, ingna lang Parfay.” Gisugdan ko pagsige’g ingon, “Parfay, Parfay.” Sige-sige akong nagkasamot pa kauhaw. Ug

akong—akong. . . Kita n'yo, ako—ako—nagkasamot ako kauhaw nga dili na gani ako makaluwa, pagkataud-taud, ako'y—uhaw na gyud ko kaayo.

<sup>140</sup> Bueno, nakita n'yo, dili kana makahimo. Wala'y bisan unsa man nga makatagbaw niini. Dili ko igsapayan, kung makainom ka man og mga coke, makainom ka man og bisan unsa nga gusto mo, sa niining mga pinatam-is nga mga carbonated nga mga tubig, ug uban pa, wala'y bisan unsa pa man nga motagbaw sa maong pagkauhaw maingon sa usa ka limpyo nga mabugnaw, bugnaw'ng buhagay sa tubig. Nga mao'y motagbaw nianang pagkauhaw. Ang tanan na niining mga butanga pangpuli lang.

<sup>141</sup> Ug nganong modawat man kita og usa ka pangpuli, sa dihang aduna ma'y usa ka tinuod nga bautismo sa Espiritu Santo nga nagatagbaw sa matag kaugatan ug pagpangandoy diha sa kalag sa tawo? Kung ingon-ana pagbarug sa atubangan sa kamatayon, sama sa giingon sa bantugang si Apostol Pablo, “O kamatayon, hain na ang imong ikot? Ug, kamatayon, hain na ang imong pagdaug? Apan salamat sa Dios, Nga nagahatag kanato sa kadaugan pinaagi sa atong Ginoong Jesus Cristo!” Kana ang kasinatian, igsoon, nga nagatagbaw nianang balaang pagkauhaw nga. . . o kanang balaang pagkauhaw nga anaa kanimo. Ginatagbaw Niini kini. Dili mo na kinahanglan pang mobuhat og bisa'g unsa pa man bahin niini. Oo, nagalimpyo Kini og mga ngabil.

<sup>142</sup> Ug didto usab, mga tawo lang nga nagakinabuhi basi sa emosyon, basi sa . . . Moingon ang uban nga mga tawo, “Bueno, daghan kami niana sa among kalihokang Pentecostal.” Ug mosulod sila, nga maayo man, ilang ipakpak ang ilang mga kamot [Ginapakpak ni Igsoong Branham ang iyang kamot—Ed.] ug ipatugtog ang musika. Mohunong ang musika, “sh, whew,” usa ka timba sa tubig ang nabubo ibabaw sa tanan, kita n'yo. Karon atong—atong ginabuhat kana, kita—aduna kita'y batasan sa pagbuhat niana. Aduna kita, kita—kita'y. . . Nahimo na gayud kini nga usa sa atong mga pamatasan.

<sup>143</sup> Sultihan ko kamo og usa ka butang. Sa diha nga nagasimba kamo sa Dios, sa Espiritu ug sa Kamatuoran, sa diha nga nahimo kining *nabatasan* na sa pagbuhat ninyo niini, tungod kay ginahunahuna ninyo nga *kinahanglan* ninyong buhaton kini; tungod kay ginahunahuna ninyo, nga kung dili kamo mosinggit, o molukso-lukso, o mosayaw dungan sa musika, mohunahuna ang inyong katapad nga nag-backslide na kamo; nagainom kamo gikan sa usa ka malang-og nga sapa. Husto!

<sup>144</sup> Gawas kon kini nagapuno sa matag kaugat-ugatan, gawas kon ang Balaang Espiritu nagabugwak-bugwak sulod kanimo; dili ko igsapayan kung nagatugtog man ang musika, kon nagatugtog man sila og *Nearer, My God, To Thee*, o unsa man kini, ginapabagting gihapon sa Balaang Espiritu ang

mga lingganay sa himaya diha sa imong kasingkasing. Kana ang nagahatag og katagbawan. Kana ang Bahin sa Dios nga nagahatag og katagbawan. Unsa pa man nga gawas Niana, impas ka na.

<sup>145</sup> Mahimo kang mosulti og laing mga dila nga sama sa mga tawo ug sa mga Manolunda, mahimong ipanghatag mo ang imong mga katigayonan ngadto sa mga kabus, mahimong magpropesiya ka, ug mahimo nga aduna ka'y kahibalo, masabot ang tanan nga mga tinago ug tanan na niining mga butanga, ug mamahimo nga wala ka gihapon (Nahaunang Mga Taga-Corinto 13) hangtud ang kanang Usa ka Butang nga nagahatag og katagbawan nga mao lang ang makatagbaw niana nga pagkauhaw.

<sup>146</sup> “Ang akong kalag ginauhaw sa buhing Dios, sama sa lagsaw nga nangandoy sa pagpangita sa tubig sa sapa. Gawas kon makita ko Kini, mamatay ako.” Pag-miabot ka na sa pagkagutom sa Dios nga sama niana, aduna'y butang nga magakahitabo. Ang Balaang Espiritu ang moagak kanimo paingon niadtong dakung mga tuboran sa Dios. Oo, sir.

<sup>147</sup> Karon, aduna'y usa ka maayong butang, ang pagsimba diha sa Espiritu. Matuod kana. Apan usahay aduna ka'y Espiritu nga wala ang Kamatuoran. San Juan 4, miingon, “Managsimba kita sa Dios, sa Espiritu ug sa Kamatuoran.” Ug si Jesus mao ang Kamatuoran. Husto gyud kana. Ug Siya ang Pulong.

<sup>148</sup> Ang mga sapa nga gipadala sa Dios aron mohatag og katagbawan kaninyo, diha sa natural, gipanghugawan na ni Satanas ang matag usa niini. Nagbutang siya og makahilo nga tambal sa matag usa niini nga iyang masudlan. Husto kana. Iyang gigamit kanang daku nga sapa, sa iglesia.

<sup>149</sup> Kana, kana ang pamaagi sa Dios. Miingon si Jesus, “Ibabaw niining Bato pagatukoron Ko ang Akong Iglesia, ug ang mga gahum sa kamatayon dili makabuntog Niini.”

<sup>150</sup> Karon aduna'y nagkalain-laing mga argumento niana. Ang Romanong mga tawo, ang mga Katoliko nagaingon, “Iyang gitukod kini diha kang Pedro.” Kita n'yo, ug kung ingon-ana man, nag-backslide si Pedro, pagkapila ka adlaw. Busa, dili Kini ingon niana. Siguradong dili kadto gitukod diha kang Pedro, kang *Petra*, ang gamay'ng bato. Ug dayon nagaingon ang mga Protestante, nga, “Iyang gitukod Kini diha sa Kaugalingon Niya Mismo, si Jesus Cristo.” Dili nga sa magpalahi-lahi, apan lahi ang pagtoo ko kay kanila. Wala Niya gayud Kini gitukod bisa'g hain man sa duha.

<sup>151</sup> Iyang gitukod Kini sa maong pinadayag sa kung Kinsa Siya. Nag-ingon Siya, “Bulahan ikaw, Simon, nga anak ni Jonas, unod ug dugo wala nagpadayag niini kanimo, kondili ang Akong Amahan nga anaa sa Langit mao ang nagpadayag niini kanimo.” Dili pinaagi og kahibalo! Wala mo Kini nakat-onan pinaagi sa

mga libro. Wala mo Kini nakat-onan pinaagi og pagpasakup sa iglesia. Wala mo Kini nakat-onan diha sa mga pagsinggit. Nakat-onan mo . . . Kondili ang Espiritu Santo Mismo ang mao'y naghatud sa Persona ni Jesus Cristo nganha kanimo, kung ingon-ana, "Ibabaw niining Bato pagatukoron Ko ang Akong Iglesia, ug ang mga gahum sa kamatayon dili makabuntog Niini." Kana nga balaang kauhaw natagbaw na diha sa Persona ni Jesus Cristo. Tan-awa. Mao kana ang butang nga gusto natong pangitaon, ang matagbaw kana nga pagkauhaw pinaagi Niana. Bueno, atong makita nga kinahanglan gayud nato.

<sup>152</sup> Kahibalo? Oh, sus! Dakung butang ang kahibalo, nagapapuno kita, ug puno kita niini sa karon. Apan nakita n'yo, ang kahibalo . . . sa gikaingon ko na sa miaging adlaw, sa paghisgot bahin nianang hisgotanan mahitungod sa kahibalo. Aduna'y usa ka lalaki nga nagatindog sa gawas, nga nagapakig-estorya sa akong higala nga atua didto, miingon, "Kung ang tawo wala nagatoo sa edukasyon, nganong nagabasa man siya sa Biblia?" Sila . . .

<sup>153</sup> Hunahuna ko, "Bueno, kung wala nila nakuha kung unsa'y giingon niadto ni Ginoong Jesus, unsaon man nila pagsabot sa usa ka burong sama kanako, kung unsa'y akong ginaingon?" Dili gani nila masabtan Siya, sa ingon ka klaro Siya kaniadto.

<sup>154</sup> Giingon Niya didto usa ka adlaw, "Gawas kon mokaon kamo sa lawas, sa Dugo, moinom sa Dugo ug mokaon sa lawas sa Anak sa tawo, wala kamo'y Kinabuhi diha kaninyo." Wala Niya kini gipasabot. Mipadayon Siya paglakaw. Husto kana. Kita n'yo?

<sup>155</sup> "Bueno," miingon sila, "usa ka balbal kining Tawhana. Gusto nato Siyang . . . nga mokaon sa Iyang lawas, moinom sa Iyang Dugo. Usa Siya ka bampira. Kita n'yo, gusto Niya kita nga mamahimong bampira." Kita n'yo? Kadtong mga intelektuwal!

<sup>156</sup> Apan miingon Siya, "Ang Akong karnero nagapatalinghug sa Akong Tingog." Kita n'yo, moabot Kini sa mga Pinili, nga gipili sa Dios pinaagi og daang-pagkahibalo. "Ug kadto sila nga ang Amahan . . . Wala'y makahimo sa pag-ari Kanako gawas lamang kon pagadanihon sa Amahan. Ug ang tanan nga gikahatag sa Amahan Kanako, magaari sila, masabtan nila Kini."

<sup>157</sup> Silang mga tinun-an dili masabtan Kadto, apan gitooan nila Kadto. Kita n'yo? Husto kana. Kon ginatooan mo Kini! Dili ko masabtan ang daghang mga butang. Ginatooan ko Kini, sa gihapon, kita n'yo, tungod kay giingon Kini sa Dios nga ingon niadto.

<sup>158</sup> Kahibalo. Kabalo mo, ang Ebanghelyo ni Satanas kahibalo. Nahibalo ba mo niana? Iyang giwali kini didto sa tanaman sa Eden, ngadto kang Eba, ug nalimbongan siya sa ebanghelyo niya nga kahibalo. Karon, ug gihugawan ang tibuok kaliwat sa tawo, pinaagi niini. Husto gyud kana. Ilang gikuha ang mga programa



pang-edukasyon, gipangbutang kini sa iglesia. Maayo man sila *dinha*, apan dili sa Pulong sa Dios. Dili, sir. Dili mo maila ang Dios pinaagi sa edukasyon. Dili mo maila ang Dios pinaagi—pinaagi—pinaagi sa paghibalo kung unsaon, ang pagtuon sa matematika ug sa pagpanglitok og lawum nga mga pulong.

<sup>159</sup> Si Pablo, usa siya ka maalam nga tawo. Apan sa pagduol niya kang Cristo, ug nadawat ang Balaang Espiritu, miadto sa mga Taga-Corinto, miingon siya, “Wala gayud ko mianhi kaninyo nga aduna’y makabibihag nga kaigmat sa pulong sa tawo,” bisan pa nga mahimo niya unta kadto. Miingon, “Nagaanhi ako kaninyo sa gahum ug pagpadayag sa Espiritu Santo, aron nga ang inyong pagtoo maanaa sa Dios, dili sa kaalam sa kung kinsang tawo.”

<sup>160</sup> Karon usahay nagahimo kita og mga programa pang-iglesia, ila usab ginapili ang ilang—ilang pastor. Ginaboto sa iglesia ang pastor, moingon sila, “Bueno, kini nga pastor, karon, nagkaaduna siya og duha ka mga titulo sa kolehiyo. Nakakat-on siya og upat ka tuig sa sikolohiya. Nagkuha siya *niini*, *niana*, *uban* pa.” Ug ilang botohon kana nga matang sa tawo (ngano man?) imbis sa pastor nga nagatoo sa Pulong sa Dios ingon nga dinihogan ug ingon nga Dios, ug nga mowali sa Pulong bisan unsa pa’y bation sa mga tawo bahin Niini.

<sup>161</sup> Giingnan sa Dios si Ezequiel, kabalo mo, miingon, “Iwali kana toohan man nila Kini o dili. Iwali mo Kini, bisan pa man.” Kita n’yo? Husto. Dawaton man nila Kini, o dili, dili nga ingon niana. Wala nila gidawat si Jesus. Mipadayon Siya sa gihapon, nga ginawali Kadto sa gihapon. Kita n’yo?

<sup>162</sup> Imbis og usa ka tinuod nga pastor nga mowali gayud sa Pulong ug motoo sa Dios, ila—ila—ilang paninguhaan nga ipasulod ang—ang pagkaintelektuwal, ang tawo nga aduna’y pinakaamaayong edukasyon; ang tawo nga makatindog sa pulpito ug nga dili gani magdugay og mga kinse minutos, aron nga makapauli sila dayon, ug moadto (ang uban) aron mobuhat og uban pang butang, ug si Ricky makasakay na sa iyang kinakusgan nga sakyanan ug makagawas na, ug makaadto na sila sa ilang mga twist party ug tanan na. Ug kini, oh, kini—kini lang kini—wala na’y uban pa kini kondili usa ka hybrid og pang-edukasyon nga kahugawan. Husto kana. Eksakto nga ingon niana gayud kung unsa kini. Husto kana. Apan unsa man kini? Nagahatag katagbawan kini sa ilang mga pangtilaw, kita n’yo, nagatagbaw kini sa pangtilaw sa usa ka kalibutanong miyembro sa iglesia.

Wala kini nagatagbaw sa pangtilaw sa usa ka balaan. Iyang dawaton ang Pulong sa tanang panahon!

<sup>163</sup> Apan ginaingon nila, “Oh, bueno, karon kining mga tawhana medyo wala sa ilang mga pangutok.” Kita n’yo, wala gayud nila, wala nila kini makuha. Sila, nagapaninguha sila sa pagkinabuhi sa usa ka nangagi na nga panahon.

<sup>164</sup> Dili ba nga pagkatalagsaon kini! Mianhi ako dinhi sa Kasadpan, ug nahibaloan ko nga tanan sila nagapaninguha sa pagkinabuhi sa usa ka panahon nga nangagi na, gusto nila kanunay ang kung unsang pangkinaraang panahon pa sa mga cowboy. Ug pag-adto mo didto sa Kentucky, ang kinaraang panahon pa sa mga hillbilly, gusto nilang manglihok og sama niini, aduna og mga programa bahin niini. Apan paghisgotan na ang bahin sa pangkinaraang Relihiyon, dili na sila makighilambigit Niini.

<sup>165</sup> Mga pangkinaraan ba nga panahon? Mianhi ako dinhi sa panahon sa rodeo, nakita kong aduna sila og usa ka dakung babaye didto, nga aduna niadtong berde nga butang ubos sa iyang mga mata, ug mubong pinutlan nga buhok, nga aduna’y sigarilyo sa iyang baba. Aba, kung nakita pa nila kana kaniadtong karaang mga panahon, mahunahunaan nila gayud nga giut-ot siya kon asa man. Ilang, ila—ila—ila na tingaling gipa-pasulod siya. Unsa kaha kung ang imong inahan migawas niadto, nga nakabisti og sama kanimo ug sa pamisti sa imong anak nga babaye sa karon, unsa kaha ang nahitabo? Gipasulod na unta siya sa lugar sa mga buang. Sigurado, nga migawas siya nga wala nakasul-ob sa iyang palda. Bueno, karon hinumdumi, mao ra sa gihapong butang kini sa karon.

<sup>166</sup> Nagakadunot na ang tawo sa ilang unod. Kung nagaagi na sila sa tunga-tungang pangidaron, tali sa mga baynte ug bayntesingko ka tuig ang edad, ang selula sa ilang utok nagakadunot na usab. Wala na sila’y . . . Nagakaingon na niana ang mga tawo mao nga wala na sila og igong pagpanabot. Wala na sila kabalo kung unsa’y kahulogan sa kaligdong. Dili na sila kabalo sa kalainan sa matarung ug kadautan. Ug, oh, bisan pa, ang ilang programa pang-edukasyon, ilang . . .

<sup>167</sup> Nakahibalo ba mo, ang edukasyon, mapamatud-an ko kini kaninyo, nga iyaha sa Yawa? Dili ang pagbasa ug pagsulat; apan, ang pasabot ko, ang pagbutang sa ilang edukasyon sa inyong iglesia.

<sup>168</sup> Unsa ma’y ginabasihan sa komunismo? Ang siyensya, edukasyon, mao kana ang ilang dios. Si Satanas, kita n’yo, mao kana kung unsa ang iyang gipaila kang Eba. Mao kana sa gihapon ang ilang ginakuptan.

<sup>169</sup> Karon nakasulod na kini sa atong mga kaiglesiahan, nakasulod na kini sa mga Baptist, mga Methodist, ug Presbyterian, mga Pentecostal, ug tanan na. Usa ka edukasyon, intelektuwal, kung unsa nga dakung *ingon ani-ug-ingon ana* ug kung sa unsang ingon niana, nga samot pa nga nagapahilayo kaniya sa Dios. Sayup kini. Oo, sir. Karon, mahibaloan nato, nga (ilang) ginatagbaw niini ang ilang pagpangandoy. Sa diha nga ang usa—sa diha nga ang usa—usa ka iglesia pilion ang usa ka butang nga ingon niana, nagapakita kini kung unsa

ang anaa sa hunahuna nianang iglesia, kung unsa ang ilang ginapangandoy, kung unsa ang ilang gikauhawan. Gusto nilang ingnon, “Halapad og panghunahuna ang among pastor. Wala lang kaniya ang pagligo namo nga magkasinagol, ug nagauban pa siya kanamo.”

<sup>170</sup> Usa ka batang babaye ang miingon sa akong bata nga si Sarah, sa miaging adlaw. Miadto sa Africa ang iyang pastor; ug sa pagbalik niya, gihubo sa maong batang babaye ang iyang sinina, niadtong gabhiona, nga suot na lang ang huut nga purol, ug gisayaw ang watusi alang kaniya, aron lingawon siya tungod kay gikan pa siya sa Africa. Ang Watusi usa ka tribu didto, kabalo mo. Sus, makita ko lang ang usa sa mga batang babaye ko, sa akong kongregasyon, nga sulayan lang pagbuhat og usa ka butang nga sama niana, watusi?

<sup>171</sup> Kita n’yo, nagapakita lang kini! Ug molingkod ang usa ka pastor ug motan-aw sa usa sa iyang kongregasyon, usa ka bata (dise-sais o dise-otso ang panuigon) nga babaye didto nga naghubo og ingon niana, ug pasagdan siya nga nakaingon niana, nagapakita lang kana nga gikan siya sa usa ka hugawanan, siya mismo, usa ka tawo sa Dios nga mobuhat og usa ka butang nga sama niana. Mao gayud.

<sup>172</sup> Diretsahan kana, apan nahibalo ako nga nagawali ako sa tibuok nasud, usab. Apan nasayod kamo niini usab, igsoong lalaki, igsoong babaye, sultihan ko kamo, mao kana ang Kamatuoran.

<sup>173</sup> Gusto sa buitre ang mga butang nga patay na. Husto kana. Ug patay kana! Husto gayud kana. Klarong nagapakita, klaro lang nga nagapakita kini dinhi kung unsay ilang pangulo ug nagakontrola nga tore nila, kung unsa’y ginahatag niini kanila, kita n’yo, kung unsa ang anaa sa ilang kalag. Nagapangandoy ang ilang kalag alang sa mga butang nga sama niana.

<sup>174</sup> Ang ilang kalag nagapangandoy alang sa usa ka mataas nga intelektuwal nga iglesia, kon diin maayo kaayo mamisti ang mga tawo, ug ang pastor modugay lang og kinse ka mga minuto, o baynte. Ug kung molagpas ka niana, ila siyang dalhon didto sa deacon board. Ug kinahanglan nga wala siya’y isulti bahin sa kasal-anan. Kinahanglan nga dili siya mosulti og bisan unsa man bahin sa pagsul-ob og mga syort, ug wala’y isulti bahin sa mga tawong nagahimo *niini*, *niana*, o *uban pa*. Kinahanglan nga dili gayud niya paghisgotan ang bahin niana. Kung buhaton nila, palagputon siya sa board. Nakita n’yo ba kung unsa kini? Mao kana ang ilang pangsala sa tawo nga nagahunahuna.

<sup>175</sup> Nag-ingon ang Biblia, diha sa Nahaunang Juan 2:15, “Kung nagahigugma kamo niining sistema sa kalibutan, o sa mga butang nga anaa niining kalibutan, tungod kini nga ang gugma sa Dios wala man diha kaninyo.”

<sup>176</sup> Karon unsa na man ang bahin niining tanan nga wala sa lugar nga ginapanghimo nila sa karon; sa ngalan sa iglesia; naga-square dancing na sulod sa simbahan, mga pag-bunco, pag-bingo, mga pag-party-party, mga naga-rock-and-roll nga mga tinedyer, mga twist, tanan na niining mga butanga! Tan-awa kining si Elvis Presley, usa ka yawa nga anaa sa maong tawo! Si Pat Boone, Ricky Nelson, ang pinakadakung kautangan nga nagkaaduna gayud kining nasud! Husto kana. Moingon sila, “Oh, pagkarelihiyoso nila kaayo, mikanta sila og mga Cristohanong alawiton.” Dili sila angay. Ang—ang iglesia dili gani angay motugot og usa ka butang nga sama niana! Manganhi ang pipila niining mga tawhana, ug—ug pagkagabii atua na sila sa usa—usa ka balay-kalingawan sa gawas dinhi, nga nagasayaw-sayaw ug nagapatugtog ug tanan na, ug pagkasunod gabii mangduol sila sa altar ug manghilaka, ug pagkasunod na sab nga gabii motugtog sila sa entablado. Oh, naunsa ba, intawon! Unsa pa man nga kahugawan, unsa pa kahalayo ang madangtan sa kahugawan, kaha? Oo, sir. Pamatud-an niya ang iyang kaugalingon una nga usa ka tawo sa Dios, dili ang tanan niining mga butanga tungod lang kay makatugtog siya og maayo sa gitara o kung unsa man.

<sup>177</sup> Sa imo pa lang pangandoy, mahibaloan mo na kung kinsa ang anaa sa trono sa imong kasingkasing. Kung unsa man ang imong gihigugma, mao kana kung unsa ang nagapaila. Ikaw, moingon ka, “Bueno, siguro para kanako okay lang sila, Igsoong Branham.” Bueno, hinumdumi lang karon, diha sa imong kasingkasing, nasayod ka kung unsa gayud ang anaa dinha. Oo, sir. Pinaagi sa kung unsa ang nagapakaon sa imong kalag, kung unsa ang gikauhawan sa imong kalag, ug nga makita mo kini nga ginatagbaw kana; kung kini man dili kining Pulong, kung ingon-ana aduna’y butang nga sayup, tungod kay ang Balaang Espiritu nagapuyo diha sa Pulong lamang. Kita n’yo?

<sup>178</sup> Gusto kong makita ninyo ang usa pa ka dakung kakuyaw, sa dili pa nato tapuson, kung dili kamo—kung dili kamo sad-an sa unsa man niining mga butang nga akong gisulti, ug, mao kana, ang kakuyaw sa dili-pagtagad sa usa ka pagkauhaw. Kita n’yo? Moingon ka, “Aduna ako’y balaang pagkauhaw. Apan ako—dili ako sad-an, Igsoong Branham, sa pag-adto ug pagpamiyembro sa iglesia, ug sa mga butang nga sama niini.” Apan, kita n’yo, ang dili-pagtagad gayud sa usa ka pagkauhaw! Kung dili mo tagdon aron matagbaw ang usa ka pagkauhaw sa tubig o pagkaon man, mamatay ka. Ug kung dili mo tagdon kana nga pagkauhaw diha kanimo, alang sa Dios, espirituhanon kang mamatay.

<sup>179</sup> Manawagan kamo alang sa mga rebaybal, hulaton ninyo ang inyong iglesia nga magkaaduna og usa ka rebaybal. Bueno, dili ingon niana—dili ingon niana nga rebaybal ang alang kanimo. Ang rebaybal kinahanglan nga mosugod mismo sulod kanimo, sa dihang nagasugod ka na sa pagkauhaw sa Dios. Mahimong wala

na'y usa pa ka miyembro, sa iglesia, nga gusto nianang rebaybal. Kung mosugod kini diha kanimo, manungha kini sa uban pang mga dapit. Kita n'yo? Apan, kita n'yo, wala mo gitagad ang kadtong pagkauhaw.

<sup>180</sup> Wala mo gitagad nga gatasan ang baka, sa diha nga ang baka . . . nga puno na sa gatas ang suso; ug kung pasagdan mo kana nga baka nga magpabilin nga ingon niana, mamalhan siya. Husto gyud kana. Kung pasagdan mo nga dili moinom og tubig, moingon, "Dili na gayud ako moinom pa," mamatay ka. Pasagdan mong dili ka mokaon, mamatay ka.

<sup>181</sup> Busa kung dili mo tagdon ang Balaang Espiritu ang Pulong sa Dios, mamatay ka.

<sup>182</sup> Kamong mga Cristohanon, kamong mga Baptist, mga Methodist, mga Presbyterian, mga Pentecostal, Assemblies of God, Oneness, Twoness, Threeness, kung unsa man kamo, kita n'yo; dili ko igsapayan, wala kana kabilinggan kanako, siguro mao usab kini sa Dios. Kita n'yo, usa ikaw ka indibiduwal, usa ikaw ka yunit. Dili gayud kamo makaadto sa Langit ingon nga usa ka iglesia, o usa—usa ka denominasyon. Moadto kamo sa Langit ingon nga usa ra ka persona, tali kanimo ug sa Dios. Kana lang. Dili igsapayan kung unsa ka man nga iglesia nahisakup.

<sup>183</sup> Ug kung mapasagdan mo nga dili basahon ang Biblia ug toohan ang Biblia, ug ang Balaang Espiritu aron nga makakaon Niana, mamatay ka. Nag-ingon si Jesus sa San Juan 4:3; ang Kasulatan nga aduna ko mismo . . . nag-ingon si Jesus nga, "Ang tawo mabuhi dili sa tinapay lamang, kondili sa matag Pulong," dili ang bahin lang Niini.

<sup>184</sup> Nagakuha kita og usa ka diyutay'ng, tipik *dinhi*. Ang tawag ko niana usa ka naki-angkas sa Biblia. Moingon sila, "Bueno, ginatoohan ko *Kini*, apan adtoan nato *dinhi* dapit, kita n'yo." Kita n'yo?

<sup>185</sup> Kinahanglan nga dawaton mo Kini, Pulong sa Pulong. Nag-ingon si Jesus, "Ang tawo mabuhi sa matag Pulong nga nagagula gikan sa baba sa Dios." Nasayod ba kamo niana? [Nagaingon ang kongregasyon, "Amen."—Ed.]

<sup>186</sup> Ug, kabalo mo, gihimo nato—gihimo nato ang panahon nga atong gikapuy-an, atong—gihimo nato kini nga panahon nga . . . usa—usa—usa ka relihiyosong pagpangtuis.

<sup>187</sup> Gitawgan ako sa akong anak nga babaye, dili pa lang dugay, ug miingon kanako, "Daddy," didto sa pikas balay, ingon niya, "ari ka *dinhi*, magkaaduna kami og usa ka pang-relihiyon nga programa." Usa ka kantahan kadto, pagpanganta og himno, ug aduna og usa ka batan-ong Ricky nga ginabasa kini didto. Ug kung aduna pa ko'y nakita nga usa ka mapasipad-on nga kalihokan, mao na kadto! Silang mga batan-on didto, ug ang mga tawo, daw sa mas usa pa kadto ka kalingawan sa entablado kon tan-awon. Usa unta kadto ka tribu sa mga Indian, ug wala

na sa lugar ang ilang ginapanghimo, ug—ug nanggilukso ug nagsinumbagay na sa usa'g usa.

<sup>188</sup> Asa na, unsa na'y nahitabo sa kamatinuuron, asa na kadtung kinaraang mga himno nga atong ginakanta sa una, ug nga nagakalipay diha sa Espiritu sa Dios, ug ang mga luha nga nagatulo sa atong mga nawong? Ug karon paningkamotan pa natong pugngan ang atong mga ginhawa hangtud nga wala na'y igong hangin diha kanato, hangtud nga ang atong mga nawong nang-asul na lang, sa pagpaningkamot nga ipakita nga usa kita ka maayong mang-aawit. Kita n'yo, nakopya nato kana sa Hollywood, ug tanan na niining mga programa nga makita nato sa tanan niining mga intelektuwal nga pagkanta sa himno ug pagpahanas og tingog. Ako—gusto kong makadungog og maayong mga pag-awit; gusto kong makadungog og maayong kinaraang, kinasingkasing, pang-pentecostal nga pag-awit. Apan siguradong ayaw nako kanang pagpangtig-ik nga mao'y tawag na sa pag-awit, sa karon. Husto kana. Sa hunahuna ko mao na kana ang binuang nga butang. Usa kini ka pagpangtuis. Husto kana.

<sup>189</sup> Gusto kong makita ang usa ka lalaki kung usa gayud siya ka lalaki. Ayaw ko nga makakita og usa nga nagsul-ob og pangsulod nga saput sa iyang asawa sa gawas dinhi, ug nga may tinabasan sa kilid; ug—ug usa ka pangkulong nga nagabitay dinhi sa atubang, ug duha ka kolor sa buhok nga nakabuhayhay sama sa bangs, nga pinutlan sa atubang. Kana, ako—dili ko mahimong tawgon kana nga usa ka lalaki. Wala siya nahibalo kung asang bahin nga kaliwat siya nahisakup. Kita n'yo? Husto kana. Makita ninyo ang babaye, tan-awa, ginapaninguhaan sa babaye nga ipaalut ang iyang, nga himoon ang iyang buhok nga sama na sa lalaki; ang lalaki usab ginapaninguhaan pagpaalut sa iyang buhok, nga may bangs, sama sa babaye. Ginasul-ob na sa lalaki ang pangsulod nga saput sa iyang asawa; ginasul-ob usab sa babaye ang mga overall nga iya sa lalaki. Kita n'yo, usa gayud ka pagpangtuis, bisa'g asa na mismo.

<sup>190</sup> Ug mao gihapon nga butang kini sa kanasuran, sa mga tawo, sa mga kaiglesiahan, sa tanan na. O Dios! Asa na ba ang katapusan sa maong butang? Sa Pag-abot na ni Ginoong Jesus Cristo, dinha na ang katapusan niini.

<sup>191</sup> Busa, kung pasagdan mong dili pakaonon ang Balaang Espiritu sa Pulong sa Dios! Miingon si Jesus, “Ang matag Pulong mao'y pinaagi sa Balaang Espiritu.” Ug paminaw karon. Kung sulayan mong pakaonon Kini og sayup nga butang, kung tinuod Kini nga Balaang Espiritu diha kanimo, mahibaloan Niini ang kalainan. Karon, hinumdumi, ang Pulong sa Dios mao'y kung unsa ang ginakaon sa Balaang Espiritu. Wala Kini nagakaon diha sa pagkaaduna'y kadasig. Wala Kini nagakaon diha sa pagkaaduna'y edukasyon. Wala Kini nagakaon diha sa pagsimba-simba. Wala Kini nagakaon diha sa mga teolohiya.

Aduna’y usa ka dakung kalainan tali sa usa ka butang nga dinihogan ug sa usa ka pang-teolohiya lang nga baruganan bahin niini.

<sup>192</sup> Kadtong tanan nga mga teologo sa mga adlaw ni Jesus, aba, atua na kanila ang pulong sa pulong, panid sa panid, nga bug-os nang nailatag, ang Mesias kinahanglan nga moabot gayud sa *niining* pamaagi! Mao gayud kini kung unsa kadto. Ug sila, ang matag usa kanila, misipyat niini. Kabalo na mo kung unsay giingon ni Jesus sa dihang miabot Siya, miingon, “Ang Yawa mao ang inyong Amahan, ug ang iyang mga buhat mao’y inyong pagabuhaton.”

<sup>193</sup> Wala kadto gipadayag kanila kung unsa ang tinuod nga Pulong. Kita n’yo, nasipyat sila sa gagmay’ng mga suok niadto, sama sa nangasipyatan nila sa karon. “Kung ikaw mahisakup sa *ingon niini* ug mahisakup sa *ingon niini*, mamaayo ka na.” Ayaw’g toohi kana. Kinahanglan nga mahisakup ka kang Cristo. Ug kung aduna gayud og Usa ka Butang diha kanimo, nga ginauhaw kang Cristo!

<sup>194</sup> Hinumdumi lang, sa didto ka pa sa bat-ang sa imong amahan, kauban ka na Niya kaniadto. Apan wala ka pa nailhan kaniadto sa imong amahan, ug wala mo pa naila kaniadto ang imong amahan. Ug kinahanglan nga moabot ka ug matawo. Ang Dios naghatag og pamaagi pinaagi sa imong inahan, alang sa—sa maong pagtanuman sa binhi, ug dayon miabot kini. Ug dayon nahimo kang usa ka lalaki o usa ka babaye, kon unsa man, dayon nailhan mo na ang imong amahan, ug mahimo nang makigkauban ang imong amahan kanimo.

<sup>195</sup> Karon, hinumdumi, kung aduna ka’y Kinabuhing Walay Katapusan, ang imong Kinabuhi atua na sa Dios sa sugod pa lang. Ug, ang Kinabuhi, ang Dios mao ang Pulong. Ug dayon sa diha nga nahimong unod ang Pulong diha kang Jesus Cristo, ang Dios nga mikanaug aron sa pagpuyo sulod sa Kaugalingon Niyang lawas, gihimo ang Iyang Kaugalingon nga Anak sa Dios. Sa dihang mikanaug ang Dios aron puy-an kana, atua ka na Kaniya sa dihang gilansang Siya sa krus. Ug gilansang ka sa krus uban Kaniya, ug namatay ka uban Kaniya didto sa Kalbaryo. Gilubong ka uban Kaniya, didto sa bukid. Ug nabanhaw ka uban Kaniya, niadtong buntag sa Pasko sa Pagkabanhaw. Ug karon kamo magkauban na nga nagalingkod diha sa Langitnong mga dapit, diha Kaniya, ug aduna ka na karon og pagpakigkauban Kaniya. Kita n’yo?

<sup>196</sup> Ang Dios Mismo nahimong usa na kanato. “Wala’y tawo nga nakakita sa Amahan, sa bisan unsang panahon, ang Bugtong lamang nga (Anak) Amahan ang nagpaila Kaniya.” Kana’y, Dios nga nahimong usa ka Tawo, aron nga mahimo Siyang makapakigkauban kanimo ingon nga usa ka tawo. Kita n’yo? Ug usa ka karon ka—usa ka ka unod, ug Siya’y unod. Nahimong

unod ang Dios sa taliwala kanato, sa Persona sa Iyang Anak, si Jesus Cristo. Ug Dios ang mao'y sulod Kaniya. Siya ang Dios, dili gayud nga ubos pa sa Dios. Siya ang Dios. "Ang Dios nga gipadayag sa Anak, si Jesus Cristo," nga nagpahimo Kaniyang *Emmanuel*, sama sa giingon sa propeta nga mamaingon niana gayud Siya.

<sup>197</sup> Karon kita n'yo, kung ingon-ana, atua ka na gayud daan sa wala pa maporma ang kalibutan, nasulat na ang imong ngalan didto sa Libro sa Kinabuhi sa Cordero. Ug kung ingon-ana unsa man ang mahimo mong kaonon? Nagakabuhi ang Balaang Espiritu pinaagi sa Pulong sa Dios. Ug karon sa Pinadayag 22:19, nag-ingon ang Biblia, "Ang si kinsa man nga magataktak og usa ka Pulong gikan *Niini*, o modugang og usa ka pulong ngadto Niini, pagataktakon ang iyang bahin gikan sa Libro sa Kinabuhi." Nakita n'yo kung unsa ka lawum kini? Dili mo mahimo, dili mabuhi ang Balaang Espiritu sa mga butang nga iya sa kalibutan.

<sup>198</sup> Sama sa usa ka langgam nga salampati ug sa usa ka uwak. Usa ka dakung hipokrito ang uwak. Ang uwak, kanang langgama mahimong moanhi ug mahimong mokaon og trigo tibuok adlaw; ug moadto usab didto ug molupad sa usa ka patay na, sa dugay na nga patay'ng lawas, ug mokaon usab niini. Mahimo siyang molingkod sa kapatagan ug makakaon siya kauban ang salampati, sa trigo, ug moadto didto ug mokaon sa patay'ng lawas.

<sup>199</sup> Apan mahimong mokaon og trigo ang salampati tibuok adlaw, apan dili kini mahimong mokaon og patay'ng lawas, tungod kay salampati kini. Ug walay unsa man nga apdo ang usa ka salampati. Usa lang ka pagtuhak nianang patay'ng lawas, patyon niini ang maong salampati. Kita n'yo, wala'y apdo kini. Ug mao kana kung unsa kini, walay kayugot.

<sup>200</sup> Ingon niana sa usa ka lunsay, tinuod nga Cristohanon. Ayaw nila ang mga butang nga iya sa kalibutan. Mokaon lang sila og Pulong sa Dios, ug mao lang Kana; kung unsay limpyo, ang Pangsala sa nagahunahuna nga tawo. Kita n'yo, nagapabilin silang buhi pinaagi Niana, ug sa Niana lang. Ang patay nga mga butang nga iya sa kalibutan, maangso kini alang kanila.

<sup>201</sup> Tan-awa kadtong karaang uwak niadtong mga adlaw sa paggun-ob sa kalibutan pinaagi sa tubig, naglupadlupad gikan sa usa ka lawas ngadto sa usa pa ka lawas, nga ginakaon kadtong dugay na nga patay'ng mga lawas, wala na siya mibalik ngadto sa arko. Apan ang salampati walay makita nga katugdunan sa iyang mga tiil, kita n'yo, mibalik siya ngadto sa arka kon diin makakaon siya og lugas. Ug ingon niana kita, nagakinabuhi kita pinaagi sa Pulong sa Dios.

<sup>202</sup> Diha sa Mga Salmo 42. Siguradong nahisulat ni David kini nga Salmo, Mga Salmo 42, sa nagapalagiw pa siya, sa dihang



giingon niya, “Ang akong kalag ginauhaw Kanimo, ingon nga ang lagsaw nangandoy sa pagpangita sa tubig sa sapa.” Tan-awa, mituaw siya. Nagapalagiw pa niadto si David. Siya’y . . . Nahaplasan na siya niadto sa lana nga igdidihog, nasayod siya nga mamahimo na siyang hari. Gihaplasan na siya sa propeta ingon nga hari. Karon himatikdi, ug atua siya didto, aduna siya’y gamay nga pundok sa mga kasundalohan, nga gilakipan og mga Gentil, ug uban pa, nga atua didto ibabaw sa bukid. Kon diin, ang iya mismong minahal nga siyudad, tungod sa ilang kasal-anan, napalibotan sila sa mga kuta sa mga Filistehanon. Ug si David, sa niadtong mainit nga adlaw, mao gayud niadtong tungora tingali niyang nasulat kini nga Salmo, “Ingon nga ang lagsaw nangandoy sa pagpangita sa tubig sa sapa.”

<sup>203</sup> Himatikdi si David sa niining kahimtang. Milantaw siya sa ubos, milantaw siya sa iyang minahal nga siyudad. Ug nahinumduman niya nga sa dihang usa pa siya kaniadto ka batang lalaki, iya sa unang dalhon didto ang mga karnero duol niining usa ka sapa didto. Usa kadto ka daku, pagkadakung lugar nga daghang mga tubig, ug usa usab ka lugar nga daghang tinapay, didtong dapita. Tinuod, ang *Bethlehem*, nagkahulogan “Ang balay sa Tinapay sa Dios.” Ug dayon sa dihang nahinumduman ni David sa pag-agi niya didto ug pag-inom niya niadtong limpyo og mabugnaw nga tubig, ug ania siya karon sa itaas didto, usa ka nagapalagiw, nga halayo sa kaugalingon niyang katawhan. Wala na’y lugar nga iyang kaadtoan, ug nagtuaw ang iyang kalag tingali alang niadtong limpyo og mabugnaw nga tubig.

<sup>204</sup> Aduna siya’y pipila ka mga alagad didto nga, sus, nga ang pinakagamay lang sa iyang pangandoy usa na ka mando. Ug sila, tulo sila, nakigbugno sa ilang dalan lahus niadtong linya sa mga Filistehanon; kinse ka milya, pito ka milya, mga ingon niana, paadto ug pabalik; nagapakig-bugno sa ilang pag-agi, ug gidalhan siya og usa ka mainom gikan niadtong tubiga. Apan nagakauhaw ang kalag sa . . .

<sup>205</sup> Ang iyang lawas, nga atua siya didto, gikinahanglan na tingali moinom gikan sa bisan unsa man nga mahimo niyang magunitan, anaa man sa usa ka daan na nga panit sa kanding ug ingon niana, nga aduna na’y daan nga mainit nga tubig, sa niadtong mainit nga adlaw. Hunahuna niya, “Kung makahigda lang ako ug matagbaw kini nga pagkauhaw nga anaa kanako! Kung makaadto lang ako unta didto sa Bethlehem ug mohigda tapad niadtong tuburan, ug moinom!”

<sup>206</sup> Ug sa pag-adto nila ug pagkakuha sa tubig, ug gidala kadto pauli, ang pagkauhaw sa iyang kalag mas labi pa gayud, dili alang sa Bethlehem, kondili gikan sa Jerusalem; ang kauhaw sa iyang kalag. Busa gisakripisyo niya ang tubig, miingon, “Dili ko man lang gayud imnon kini.” Iyang giyabo kadto sa yuta. Kita n’yo, mas giuhaw ang iyang kalag alang sa Dios, kay sa ang

pagtagbaw kadto sa usa ka maayong. . . ang kauhaw niya nga iya sa iyang lawas, sa usa ka limpyo og mabugnaw nga tubig. Iyang giyabo kadto sa yuta.

<sup>207</sup> Kita n'yo, ang Balay sa Dios, ang nagapabugnaw sa kalag nga tubig sa Jerusalem, nga iyaha sa kahitas-an! Nag-ingon si Jesus, sa Juan 6:33, "Ako mao ang, Tinapay nga nagahatag og Kinabuhi. Ako mao ang Tinapay nga nagahatag og Kinabuhi." *Bethlehem*, "balay sa Dios," ang atong iglesia, ang yutan-ong iglesia sa Dios, ang iglesia nga ania sa yuta. Gusto natong moadto sa iglesia dinhi sa yuta, apan mas labi pa ang Jerusalem, nga anaa sa itaas, nga mao ang Dios. Ang Jerusalem nga anaa sa itaas, nga mao'y Dios! Labi pang daku kana nga pagkauhaw nga anaa sa kalag, nga maatua kauban Niya, kay sa niining matagbaw lang ang imong kaugalingon pinaagi sa pagpamiyembro sa usa ka iglesia kon asa man. Kita n'yo, ang pagpamiyembro sa iglesia wala nagatagbaw nianang pagkauhaw. Napamatud-an kini ni David dinhi, ang mga tubig nga gikan pa mismo sa balay sa Dios, kita n'yo, giyabo niya kini sa yuta; aron nga makakuha og pabor, aron makakuha og usa ka limpyo og mabugnaw nga pag-inom gikan sa Dios. Bisan pa sa kadtong. . . Labi pang daku ang maong pagkauhaw nga anaa kaninyo, ang kanang pagkauhaw sa ginauhaw nga kalag alang sa Dios.

<sup>208</sup> Himatikdi ang Jerusalem, nga pulong. "Ang Jerusalem gikan sa itaas," ang giingon sa Biblia, "nga siya'y. . . mao ang Inahan natong tanan." Ug si Cristo mao ang atong Inahan. Nahibaloan nato nga ang Dios mao ang atong Inahan, tungod kay natawo kita Kaniya. Nagkahulogan lang ang maong pulong og "pakigdait," Jerusalem, *Shalom*. O, *Shalom*, nga nagkahulogan og "pakigdait," Jeru-shalom, kita n'yo, nagkahulogan og "pakigdait."

<sup>209</sup> Mas labi pang angay'ng daku ang pagkauhaw nga anaa sa unsa mang kalag, alang sa mga tubig sa Kinabuhi, kay sa ingnon nga nahisakup ka sa usa ka iglesia; ang pagkauhaw nga anaa sa kalag dili mahimong tagbawon, ang tinuod og matuod nga pagkauhaw. Mahimo kining tuison. Mahimo mong *hunahunaon* nga okay ka lang sa pagpahisakup mo sa iglesia, apan dili ingon niana Kini. Dili kana mohatag og katagbawan sa tinuod nga balaang pagkauhaw alang sa Dios. Dili gayud mahimo niini kini. Dili gayud. . . Wala gyud Kini dinha.

<sup>210</sup> Karon si David miingon, sa Mga Salmo 42:7 dinhi, "Sa dihang ang kahaladman nagatawag ngadto sa Kahiladman, sa dinaguok sa Imong mga busay," ang pagpanawag nga iyaha sa kalag.

<sup>211</sup> Tan-awa, kanunay ko na gigamit kini ingon nga usa ka paghulagway. Kon aduna'y silik sa likod sa usa ka isda, kinahanglan nga mahibutang gayud kini dinha aron magamit

niya sa paglangoy. Aduna siya’y panginahanglan alang niana. Karon unsa kaha kung moingon siya, “Mamahimo akong usa na ka lahi nga isda. Mamahimo na akong usa ka maalamon, edukado nga isda. Uh-huh, ako—ako gayud... Magatoo ako sa usa ka tinuod nga teolohiya! Nagatoo ako nga dili ko na kinahanglan kana nga silik”? Dili na gyud siya makalangoy og layo-layo pa sa tubig, dili ba? Ug husto gayud kana.

<sup>212</sup> Unsa kaha kung miingon ang kahoy, “Karon, kabalo ko nga kinahanglan aduna gyu’y yuta una, para pagatuboan ko. Husto kana. Angay nga motubo ako diha sa yuta. Apan mamahimo akong usa ka lahi nga kahoy, gusto ko nga ipahimutang lang nila ako dinhi sa tunga sa dalan, aron nga mahimatikdan ako”? Kita n’yo, dili gayud siya mabuhi og dugay pa. Kita n’yo? Husto kana.

<sup>213</sup> “Sa dihang nagatawag ang kahiladman ngadto sa Kahiladman.” Nagakinahanglan kini og labaw pa kay sa pagpasakup lang sa iglesia. Nagakinahanglan kini og labaw pa kay sa paglamano lang sa kamot sa magwawali. Nagkinahanglan kini og labaw pa kay sa ang pagkinabuhi og maayo, matarung nga kinabuhi. Nagakinahanglan kini sa kung unsang butang nga makatagbaw sa anaa sa sulod mo, nga nagabuhagay gikan sa Dios, pasulod ngadto sa kalag. “Ang kahiladman nga nagatawag ngadto sa Kahiladman, sa dinaguok sa Imong mga busay, O Ginoo. Ang kahiladman nga nagatawag ngadto sa Kahiladman!”

<sup>214</sup> Unsa man nga matang kaha sa pagkauhaw ang mahunahunaan natong ania kanato karong gabhiona? Kita, ingon nga mga tawong Pentecostal, asa na kita paingon? Unsa man nga matang kaha sa pagkauhaw ang ania kanato? Unsa man nga matang kaha sa pagkauhaw ang ania kanako? Unsa man nga matang kaha sa pagkauhaw ang anaa kaninyo? Ayaw gayud sulayi nga pahilumon kana nga balaang pagkauhaw nga alang sa Dios.

<sup>215</sup> Daghan nang katuigan ang nangagi, sa aduna pa sila og mga bulawan dinhi sa mga kabukiran. Nakabasa ako og usa ka estorya, daghan na nga mga tuig ang milabay, kanunay kong mahinumduman kini. Nag-ingon nga aduna kaniadto og usa—usa ka tigsuhid og mina ang mianhi dinhi kon asa man sa mga kabukiran dinhi, ug nanuhid og mga bulawan, ug nakasuhid siya og usa ka dakung minahan. Ug mibalik siya, nga nagahunahuna; nga sa pag-abot niya sa siyudad, kung mamaunsa na siya, mawala na ang tanan niyang mga problema. Ug—ug iyang—gisulayan niya sa—sa pag-ingon, “Pagkaugma moadto ako ug akong. . .” Diha sa usa lang ka adlaw nga pagbiyahe, maatua na siya sa siyudad, ug dala na niya ang bulawan. Ug nagkaaduna siya og usa ka saku nga puno niini.

216 Kauban niya ang iyang iro. Dili nga ginakumpara ko ang iro sa Balaang Espiritu, apan ingon lang sa usa ka paghulagway. Apan kining iroa . . .

217 Tibuok gabii, ang maong tigsuhid sa bulawan nakahigda sa iyang higdaanan, ug—ug misugod siya sa paghunahuna, “Karon, pagkaugma akong—dalhon ko na ang tanan kong bulawan, ug mamahimo na ako kung unsa gayud nga dugay ko nang gipangandoy. Ako—ako—dugay ko nang gipangandoy nga mamahimong usa ka dato nga tawo. Ako—gipangandoy kong makapanag-ya og maanindot nga mga butang, ug uban pa.”

218 Ug—ug dayon kining iroa misugod pag-usig, ug tungod nga aduna’y nagapaduol nga kaaway. Ug siya—migawas siya didto, ug miingon siya, “Paghilum!” Ug busa mihilum ang iro. Ug wala pa magdugay nga nakabalik sa iyang higdaanan, misugod siya nga medyo matulog na, ug nagsugod na usab ang iro, ginasige na gayud bira ang kadena. Ug miadto siya sa pultahan pag-usab, miingon, “Paghilum! Gusto ta kang pahibaloong nga unsa na ako ka dato nga tawo pagkaugma, kita mo,” ug mao gyud kadto ang daku niyang mga pangandoy. Apan misugod na usab pag-usig ang iro.

219 Ug sa katapusan, mibati na siya’g dili maayo, miadto siya ug gikuha niya ang shotgun ug gipusil ang maong iro, ug namatay kini. Miingon siya, “Wala na ka’y pulos kanako, bisan pa man. Usa na ako ka dato nga tawo pagkaugma. Mamahimo na akong usa ka dato nga tawo, pagkaugma.”

220 Ug iyang gibutang na ang maong pusil sa suok, gitalikdan na ang pultahan, natulog na dayon. Ug ang tawo nga dugay nang nagsunod-sunod kaniya, sa pipila na ka adlaw, nakasulod ug gipatay siya. Dili na siya usa ka dato nga tawo, kita n’yo, gipahunong niya kadtong hagongan nga nagapasidaan nga naningkamot pagsulti kaniya nga delikado na ang iyang kabuhi.

221 Ug, igsoong lalaki, igsoong babaye, dili mo gayud mahimong. . . Ayaw gayud sulayi nga pahilumon kana nga balaang pagtawag sa imong kasingkasing, kita n’yo, pinaagi sa pagpamiyembro sa usa ka iglesia, pinaagi sa pag-asoy-asoy og usa ka kredo, pinaagi og pagpamiyembro ngadto sa usa ka organisasyon.

222 Aduna’y usa lang ka butang nga makahatag og katagbawan niini, mao kana ang Persona, si Jesus Cristo. “Ingon nga ang lagsaw nangandoy sa pagpangita sa tubig sa sapa, mao usab ang akong kalag nangandoy sa pagpangita Kanimo, O Dios. Ang akong kalag ginauhaw sa buhi nga Dios!” Kita n’yo, aduna gyu’y butang diha kanimo, nga gustong makita ang lihok sa Dios. Nagakauhaw ang imong kalag alang Niini. Ayaw paghunong sa unsa man nga kulang Niiana.

223 Ayaw tugoting sultihan ka sa kung kinsa nga pastor nga, “Kinahanglan kang makiglaman lang kaniya, magpamiyembro

sa iglesia, o nga mahisakup ngadto *niining* organisasyon.” Ayaw gyud patya kana nga balaang pagkauhaw. Nagapasidaan kini kanimo. Moabot ang adlaw sa dihang maabot mo na ang kinatumyan sa dalan.

<sup>224</sup> Sama sa usa ka batan-ong babaye gikan sa siyudad nga among gigikanan. Giestorya niya ang... Usa ka batan-ong babaye ang miadto didto sa simbahan, ug usa ka maayo gayud nga batan-ong babaye. Ug nagalakaw siya didto sa dalan. Aduna siya’y taas nga buhok, kabalo mo, ug nakabuhayhay sa likod ang iyang buhok sama sa usa ka mahapsay nga pagkapanit nga sibuyas, halos, ug kon tan-awon ang iyang nawong... wala gyu’y make-up. Ug kini nga dalaga sa una ginakatawan ang maong batan-ong babaye, miingon, “Kung dili lang unta tungod nianang upaw na nga magwawali nga aduna kamo didto,” nga ako ang ginapahinungdan, miingon—miingon, “medyo mahimo ka pa untang disente kon tan-awon. Apan ang hitsura mo daw sa kung unsang butang nga gikan pa sa baligyaan sa mga antique.” Ug, oh, iya gayud siyang sawayon, sa matag higayon nga iya siyang makita nga nakaingon niana. Miingon, “Halapad og hunahuna ang among pastor.” Miingon, “Siya—siya—nahibalo siya kanila. Kana, kon ngano nga ingon ka niana? Dili mahinungdanon kana, kung unsa ka mamisti o maghunahuna.” Mahinungdanon kini! Nagaingon ang Biblia sa Dios nga mahinungdanon kini. Mabuhi kita pinaagi sa matag Pulong!

<sup>225</sup> Busa kining batan-on nga babaye wala gayud mihatag ni gamay nga pagtagad kaniya, mipadayon lang. Usa na siya ka misyonera karon.

<sup>226</sup> Busa dayon kining—kining maong dalaga natakdan og usa ka sakit sa pangulag, ug namatay siya. Ang usa ko ka higala ang mao’y nag-indyksiyon kaniya sa likido nga pang-embalsama sa namatay na siya. Giingnan niya ako, miingon... Human nga siya namatay, padayon niyang mapanimahoan ang maong likido. Aduna siya’y bangag nga ginaut-ot ang iyang kilid, sakit sa pangulag. Wala gani sila... Bisan ang iyang mga ginikanan wala mahibalo kung unsa gayud ang sakit niya. Ug namatay siya. Apan sa wala pa siya namatay... .

<sup>227</sup> Nagtudlo siya niadto og Sunday school. Ug nangabot ang tanan nga gamay niyang mga ginatudloan sa Sunday school, gusto nila siyang makita sa diha nga moadto na siya sa Langit, nga moabot na ang mga Anghel ug kuhaon na siya. Ug ang iyang pastor nga atua sa gawas, nga nagapanigarilyo, nagalakaw pabalik-balik sa pasilyo sa ospital. Ug nga silang tanan mokanta sa diha nga mamatay na siya, kabalo na mo. Kabalo sila nga mamatay na gayud siya. Nag-ingon na ang mga doktor nga mamatay na siya, busa ilang tanan tan-awon ang mga Anghel nga moabot, nga kuhaon na siya.

228 Ug sa kalit lang, sa diha nga naatubang na niya ang realidad! Karon, usa siya niadto ka matinuurong miyembro sa iglesia, usa siya kaniadto ka magtutudlo sa Sunday school, ug usa ka matinuurong miyembro sa usa ka maayo og dakung iglesia sa denominasyon. Apan sa misugod na siya pagpakigbisog, nga gihampak na sa kamatayon; nga ang iyang mga mata nangbudlot na, ug miingon siya, “Naalaut ako!” Miingon siya, “Naalaut ako!” Adtoa, tawga ang pastor!”

229 Gilabay niya ang iyang sigarilyo, ug misulod, miingon, “Ania na, ania na! Ania na, ania na! Tawagon namo ang doktor aron hatagan ka og indyeksiyon.”

230 Miingon, “Dili ko gusto og indyeksiyon.” Miingon, “Maglilimbong ka og tawo! Mamatay na ako, ug mopaingon gyud ako sa impiyerno. Ug naalaut gayud ako tungod kay gipakyas mo pagsulti kanako sa Kamatuoran. Adtoi og kuhaa kadtong Goodhue nga batan-ong babaye, ug dalha siya dinhi kanako, sa madali. Husto siya.”

231 Hulata hangtud nga maatubang mo ang realidad sa usa ka higayon. Ayaw gayud sulayi nga pugngan kana nga balaang pagkauhaw. Ayaw gayud Kini pabuthig-palayo pinaagi sa kung unsang moderno, pang-edukasyon, nga dobleng-tubo nga shotgun. Pagpaminaw ngadto nianang pagpasidaan sa Espiritu Santo, karong gabhiona, nga nagapasidaan kanimo, “Ako mao ang Dalan, ang Kamatuoran, ug ang Kinabuhi; walay bisan kinsa nga makaadto sa Amahan, kondili pinaagi Kanako.” Ug Siya mao ang Pulong.

Iduko nato ang atong mga ulo sa kadali.

232 Gusto kong mokutlo og usa pa ka Pulong ni Ginoong Jesus, samtang nga nagapamalandong kamo bahin niini. Nag-ingon si Jesus, sa Mateo 5, “Bulahan ang mga gigutom ug giuhaw.” Bulahan pa gani ang magkaaduna og nianang pagkauhaw nga anaa kaninyo. Miabot ka na ba sa punto nga ang imong—imong—ang tibuok mong sistema hinugawan na’g maayo sa denominasyonismo, ug sa gagmay’ng mga relihiyosong katiponan ug mga grupo-grupo, ug ingon nianang mga butang, gagmay’ng pang-iglesiang mga kalagdaan, pang-kapunongan, sama og pag-apil-apil sa mga kahugpongan, ug uban pa, pagbalhin-balhin og simbahan? Nahimo na bang ibubo sa Yawa kanang tubig sa kahugawan, ug nagsige ka og timpasaw niini, sama sa usa ka baboy diha sa bahoganan? Sa dihang, wala gani ka nahibalo kung unsa gayud ang tinuod nga nagapatagbaw og kauhaw nga iya sa Dios; ang makita Siyang, usa ka realidad, pinaagi sa Balaang Espiritu nga nagapuyo kanimo, ug nga nagapadayag. Kung ikaw—kung ingon niana ka karong gabhiona, kung nagakauhaw ka sa gihapon sa Dios, sultihan ta ka:

Aduna'y usa ka Tuboran nga puno sa Dugo,  
 Gikan sa mga kaugatan ni Immanuel,  
 Kon diin ang mga makasasala nanglusbog sa  
 maong baha,  
 Mangatangtang ang tanan nilang mga lama sa  
 sala.

Kadtong naghimalatyon na nga kriminal  
 nalipay nga makita  
 Kadtong Tuboran sa iyang adlaw;  
 Didto ako unta, nga bisan og makasasala sama  
 kaniya,  
 Pagahugasan ang tanan kong kasal-anan.  
 Sukad gayud nga pinaagi sa pagtoo nakita ko  
 kadtong sapa  
 Nga gikan sa samad Mong nagadagayday,  
 Gugmang nagatubos mao na'y akong tema,  
 Ug magpabilin ingon sa gihapon hangtud nga  
 ako mamatay.

<sup>233</sup> Kung nagkaaduna ka niana nga pagkauhaw karong gabhiona, sa pag-ila pa'g dugang bahin sa Dios, ug aron sa pagduol pa'g dugang ngadto Kaniya, mahimo bang itaas mo ang imong kamot karon samtang nga nakaduko ang matag ulo, moingon, "Iampo ako." O Dios, tan-awa ang mga kamot!

<sup>234</sup> Didto sa kayutaan kon diin nga nagakadangat ang sibya karon, gikan sa Sidlakan, Amihan, Kasadpan, ug Habagatan, kamo nga anaa dinha sa mga lawak, itaas ang inyong mga kamot ngadto sa mga pastor ug kung kinsa man ang anaa dinha, nga inyong ginapangandoy; ikaw, nga may usa ka butang nga anaa kanimo, nga nagakauhaw alang sa Dios. Kanang balaan nga pagkauhaw!

<sup>235</sup> Ayaw tagbawa kini. Oh, moingon ka, "Igsoong Branham, ako—nakasinggit na ako makausa. Nakasayaw na ako diha sa Espiritu." Ayaw, ayaw, ayaw gayud gamita kana. Dili.

<sup>236</sup> Hulata hangtud nga nagaabot na kanang katagbawan, nga nagasulod na ang maong nagahatag og katagbawan nga Bahin sa kahupnganan sa Balaang Espiritu, kung ingon-ana kining mga lingganay sa kalipay sa pagsinggit, ug sa pagpanulti og laing mga dila, ug pagsayaw diha sa Espiritu, moabot na. Dili mo na kinahanglan buhaton kini subay sa musika. Pagabuhaton mo kini sa nagabiyaye ka diha sa dalan, sulod sa imong awto. Pagabuhaton mo kini samtang nagapanilhig ka sa salog. Pagabuhaton mo kini samtang nga nagadukdok ka sa lansang sa bongbong, diha sa imong pagpamanday. Bisan asa ka man, kana gayud nga dili-ikaasoy'ng Kalipay ug puno sa himaya!

Mag-ampo kita.

<sup>237</sup> Minahal nga Langitnong Amahan! Madugay, hataas, napadugay, kining gamay'ng Mensahe karong gabhiona, apan,

Minahal nga Dios, hinaut nga ihatud sa Imong Balaang Espiritu ang—ang maong kahulogan ngadto sa matag kasingkasing. Mismo sa niining iglesia, karong gabhiona, aduna’y pinilopilo nga kadaghanon sa mga kamot ang nagpataas, sa tibuok palibot sa maong lawak ug sa tanan nang dapit. Kami—nagaampo kami, minahal nga Dios, alang kanila. Oh, hinaut nga kanang nagahatag og katagbawan nga Bahin sa Dios, nga mao si Cristo, ang Paglaum alang sa Himaya, ang Paglaum alang sa Kinabuhi diha kaninyo, hinaut nga moabot Kini ngadto sa matag usa kanila.

<sup>238</sup> Didto sa tibuok nasud, gikan sa California, paingon sa New York karon, kon diin nga sayo pa sa kabuntagon, nagapaminaw sila didto; didto sa—sa New Hampshire, ug paingon didto sa Boston, ug hangtud didto sa Texas, lahus sa Indiana, hangtud didto sa California, ug palibot. O Dios, tan-awa kadto nga mga kamot; tan-awa kung unsa ang anaa sa sulod niini, Ginoo, kanang kasingkasing dinha nga gigutom ug giuhaw.

<sup>239</sup> Kining tinuis nga panahon, kon diin nabutahan na sa Yawa ang mata sa mga tawo, sa pagpasakup na lang sa iglesia, ug moingon, “Ingon lang niana ang imong kinahanglan.” Ug ginatan-aw nila sa gihapon ang ilang mga kaugalingon ug makita kung unsa ang ilang ginapamuhat, ug ang ilang pangandoy nga mamahimong sama sa kalibutan.

<sup>240</sup> Sa dihang, nagaingon ang Biblia kanamo, “Kon ginahigugma gani namo ang mga butang sa kalibutan, ang gugma sa Dios wala man lang dinhi kanamo.”

<sup>241</sup> Hunahunaon lang, Amahan, kon giunsa paghimo nga matuis niya kanang tinuod og matuod nga Pulong, kung giunsa nga mahimo nilang ingnon, “Oh, nagatoo kami sa Biblia, apan dili *Kini*. Wala namo *Kini* ginatoohan. Ginatoohan namo *Kini* nga alang sa laing kapanahonan. Nagatoo kami nga *kini* mao Kana,” tungod kay, kung unsang denominasyon ang nagtuis sa ilang mga hunahuna paingon nianang hugawanan.

<sup>242</sup> Sa dihang, nag-ingon si Jesus, “Ang si kinsa man nga magataktak og usa ka Pulong gikan *Nini*, o magadugang man og usa ka pulong ngadto Niini, pagataktakon ang iyang bahin gikan sa Libro sa Kinabuhi.”

<sup>243</sup> Minahal nga Dios! Mahunahuna ang mga pagkapalaw didto na sa Paghukom, sa dihang nagkinabuhi ang mga tawo og usa ka maayo, limpyo, balaan nga kinabuhi, nanggisimba nga ingon gayud ka matinuuron nga mahimo nila, ug mangalaglag.

<sup>244</sup> Mahunahuna ang kadtong mga Fariseo, kung giunsa, nga gikan pa sa ilang pagkabata, nanagbansay na sila sa Pulong, nanggi-eskwela sa mga eskwelahan ug tanan na, balaan (kinahanglan gayud, o batohon sila hangtud mamatay), ug nag-ingon si Jesus, “Ang Yawa mao ang inyong Amahan.”



<sup>245</sup> Kung giunsa nga miadto didto ang Israel! Ug tugoti nga mamahimo kining usa ka pahamatngon ngadto sa mga Pentecostal, Ginoo, sa tibuok kayutaan. Kung giunsa nga si Moises, nga usa ka propeta, miadto didto sa Egipto, sa pagtuman sa Pulong sa Dios, aron ihatud ang kahayag sa kagabhion ngadto kanila! Kung giunsa nga ilang nasaksihan ang dagkung mga milagro sa Dios! Kung giunsa nga gisunod nila siya, nga mitabok sa Dagat nga Mapula, gipangbautismohan diha kaniya, miadto sa kamingawan ug mikaon sa pagkaon sa mga Manulonda nga nangahulog gikan sa Langit. Ug dayon misalikway sa pagdawat sa tanang Pulong, sa dihang nangabot sila gikan sa Kadesh-barnea . . . ngadto sa Kadesh-barnea, gikan sa—gikan sa yutang saad, ug nanggi-ingon, “sama sila sa mga higante; dili nato mahimo kini.” Sa dihang, nag-ingon na ang Dios, “Ako nang gihatag kini nga yuta kaninyo”! Panghangtud utlanan lang! Miingon si Jesus, “Mao sila, ang tanan, nangamatay. Patay na sila,” nangalaglag, nga walay Dios, bisan nga nangahimo na nila kining mga butanga. Nasaksihan nila kini nga mga milagro; nangalipay, pabalik-balik nga nanagsayaw didto sa baybayon, kauban ni Miriam, sa dihang ginapatugtog nila ang tamborin. Ug ang tulo lamang, sa duha ka milyon, ang nakasulod.

<sup>246</sup> Naamgo namo, Amahan, sa diha nga ang semilya, ang binhi nga gikan sa lalaki ug babaye, nagkatagbo, aduna’y usa lamang, gikan sa usa ka milyon, ang modawat. Usa ka binhi nga gikan sa lalaki ang makakaplag sa himsog nga itlog sa babaye, sa babaye gayud, ug ang uban pa nga usa ka milyon mangamatay.

<sup>247</sup> Aduna’y usa ka milyon, duha ka milyon, ang nanggawas sa Egipto; duha ra, si Josue ug si Caleb, ang nakasulod sa maong yuta. Usa sa usa ka milyon. Amahan, ako—mangurog ako pagmahunahunaan ko kana. Hunahunaon, nga sa tibuok kalibutan karon, sa lima ka gatus ka mga Cristohanon, mamahimong lima ka gatus lang niana kung moabot Ka na karong gabhiona. O Dios, hinumdoman namo nga ang matag Pulong sa Dios nagabarug, nga usa ka handumanan. Kinahanglan namong toohan Kini. Kinahanglan namong tumanon Kini.

<sup>248</sup> Ug sa dihang miingon Ka, “Maghinulsol, ang matag usa kaninyo, ug magpabautismo kamo sa Ngalan ni Jesus Cristo sa kapasayloan sa inyong mga sala, ug madawat ninyo ang gasa nga Espiritu Santo. Kay ang saad alang kaninyo, ug sa inyong mga anak, ug sa tanan nga anaa sa halayo, sa matag usa nga pagatawgon sa Ginoo nga atong Dios.” Ug, Dios, nagapanawag Ka sa gihapon, karong gabhiona, ug ang saad mao’y samtang nga Ikaw nagapanawag.

<sup>249</sup> Ug napangtuis na sa mga ministro ang mga hunahuna sa kadtong mga tawo, ug gidumalahan kini pinaagi og usa ka pang-edukasyon, pangdenominasyon nga eskwelahan sa teolohiya, ngadto sa usa ka butang nga moingon, “Oh, motoo ka lang.”

Nagatoo usab ang Yawa, apan dili niya madawat ang Balaang Espiritu. Si Judas Iscariote usa ka . . . gihimo ang tanan—ang tanang uban pa, nga gipanghimo sa mga tinun-an, nagwali sa Maayong Balita; apan sa panahon na alang kaniya aron nga madawat na ang Espiritu Santo, nagpakita siya sa iyang kinaiya.

<sup>250</sup> Dios, hinaut nga maamgo sa mga tawo sa kayutaan karong gabhiona nga, ang pagkawala’y ingon niana nga kasinatian, nangahisalaag sila. Hinaut mamahimo karong gabhiona nga ang ilang mga kalag mahatagan og katagbawan sa Imong Bahin, Ginoo, samtang nga ginatugyan namo sila ganha sa Imong kamot. Mga Imo man sila, Ginoo. May katungdanan lamang kami sa Pulong. Nagaampo ako nga magatoo sila sa tibuok nilang kasingkasing, ug mapuno sa Espiritu Santo. Nagapangamuyo kami sa Ngalan ni Jesus. Amen.

I love Him, I love Him  
Because He first loved me  
And purchased my salvation  
On Calvary’s tree.

<sup>251</sup> Oh, Siya ba ang inyong Bahin nga nagahatag og katagbawan? [Nagaingon ang kongregasyon, “Amen.”—Ed.] Oh, sus! Gihigugma ba ninyo Siya sa tibuok ninyong kasingkasing? [“Amen.”] Karon, mahait silang mga Pulong usahay, apan mang-awit lang kita diha sa Espiritu karon, kita n’yo, ang matag usa kanato karon. Manglamano kita sa igsoong lalaki nga naglingkod tapad kaninyo, sa igsoong babaye, ug ingnon lang, “Ang Dios magapanalangin kanimo, magpapanaw,” samtang atong kantahan kini pag-usab. [Nagapakiglamano si Igsoong Branham sa mga tawo.]

I love Him, I love Him  
Because He first loved me  
And purchased my salvation  
On Calvary’s tree.

<sup>252</sup> Karon nakapakiglamano na kita sa usa’g usa. Karon ipiyong lang nato ang atong mga mata ug mang-awit diha sa Espiritu, nga itaas ang atong mga kamot ngadto Kaniya.

I love Him, I love Him  
Because He first loved me  
And purchased my salvation  
On Calvary’s tree.

Oh, dili ba Siya pagkahibulongan?

Wonderful, wonderful, Jesus is to me,  
The Counselor, Prince of Peace, Mighty God is  
He;  
Oh, saving me, keeping me from all sin and  
shame,  
Wonderful is my Redeemer, praise His Name!

Oh, wonderful, wonderful, Jesus is to me,  
 Counselor, Prince of Peace, Mighty God is He;  
 Saving me, keeping me from all sin and shame,  
 Wonderful is my Redeemer, praise His Name!

<sup>253</sup> Oh, nadasig ba mo sa inyong nasinati kang Cristo? [Nagakalipay ang kongregasyon, "Amen."—Ed.] Dili ba Siya pagkahibulongan? Dili ba Siya nagahatag og katagbawan?

I once was lost, now I'm found, free from  
 condemnation,  
 Jesus gives liberty and a full salvation;  
 Saving me, keeping me from all sin and shame,  
 Wonderful is my Redeemer, praise His Name.

Oh, wonderful, wonderful, Jesus is to me,  
 Counselor, Prince of Peace, Mighty God is He;  
 Oh, saving me, keeping me from all sin and  
 shame,  
 Wonderful is my Redeemer, praise His Name!

<sup>254</sup> Nagatoo ba kamo nga subay kana sa Kasulatan? [Nagaingon ang kongregasyon, "Amen."—Ed.] Nag-ingon ang Biblia, "Ipakpak ang inyong mga kamot. Panaghugyaw kamo sa tingog nga malipayon ngadto sa Ginoo." Kabalo mo, dugay ko nang gusto motugtog og musika. Ang akong anak nga babaye, si Rebekah, nagaeskwela og piano. Ang gamay ko nga batang lalaki nagaeskwela og trumpeta. Apan ako—natun-an ko ang tulonggon nga may napulo ka kuldás. [Misugod pagpakpak sa iyang mga kamot si Igsoong Branham.]

Wonderful, wonderful, Jesus is to me,  
 Counselor, Prince of Peace, Mighty God is He;  
 Saving me, keeping me from all sin and shame,  
 Wonderful is my Redeemer, praise His Name!

Gihigugma ba ninyo Siya? [Nagaingon ang kongregasyon, "Amen."—Ed.]

We'll walk in the Light, a beautiful Light,  
 Come where the dewdrops of mercy are bright;  
 Shine all around us by day and by night,  
 Jesus, the Light of the world.

We'll walk in the Light, it's such a beautiful  
 Light,  
 It comes where the dewdrops of mercy are  
 bright;  
 Shine all around us by day and by night,  
 Jesus, the Light of the world.

<sup>255</sup> [Misugod nga laylayan ni Igsoong Branham ang, "Jesus, the Light of the World," ug dayon ang kongregasyon usab nagapanglaylay uban kaniya—Ed.] Simbaha ninyo ang Dios sa tanan nga anaa kaninyo.

When the saints go marching in,  
 When the saints go marching in,  
 Lord, I want to be in that number  
 When the saints go marching in.

Oh, when they crown Him Lord of all,  
 When they crown Him Lord of all,  
 Lord, I want to be in that number  
 When they crown Him Lord of all.

Oh, when the sun refuse to shine,  
 When the sun refuse to shine,  
 Lord, I want to be in that number  
 When the sun refuse to shine.

<sup>256</sup> Gusto ba ninyo kana? [Nagaingon ang kongregasyon, “Amen.”—Ed.] Karon nahunahunaan ko kung nakabig na ba kaha ang inyong mga tiil, wala na kamo nagasayaw, didto para sa kalibutan? Kita n’yo? Iundak-undak nato ang atong mga tiil, ngadto sa Ginoo, ngadto sa Ginoo. Kamo, nakabig na ba ang inyong mga kamot, nga wala na kamo nagapangawat? Ang inyo bang mga ngabil nakabig na, nga wala na kamo nagapamakak? Ayaw lang ipasulod ang relihiyon sa inyong ulo, ipasulod kini sa kinatibuk-an ninyo. Mao kana. Gikinahanglan niini ang kinatibuk-an nga pagkatawo. Husto kana. Karon iundak-undak nato ang atong mga tiil.

When the saints go marching in,  
 When the saints go marching in,  
 Lord, I want to be in that number  
 When the saints go marching in.

Oh, when the saints go marching in,  
 When the saints go marching in,  
 Lord, I want to be in that number  
 When the saints go marching in.

Karon atong itaas ang atong mga kamot.

When the saints go marching in,  
 When the saints go marching in,  
 O Lord, I want to be in that number  
 When the saints go marching in.

When they crown Him Lord of all,  
 When they crown Him Lord of all,  
 Lord, I want to be in that number  
 When they crown Him Lord of all.

<sup>257</sup> Dili ba ninyo Siya ginahigugma? [Nagaingon ang kongregasyon, “Amen! Himaya! Alleluya!”—Ed.]

Then we'll walk in the Light (Siya ang  
Kahayag, kabalo na mo), It's a beautiful  
Light,  
It comes where the dewdrops of mercy are  
bright;  
Well, shine all around us by day and by night,  
Jesus, the Light of the world.

<sup>258</sup> Nagatoo ba kamo nga Siya ang Kahayag sa kalibutan? [Nagaingon ang kongregasyon, "Amen."—Ed.] Nagatoo ba kamo? Nag-ingon si Pablo, "Pagmokanta ako, mokanta ako diha sa Espiritu. Pagmosimba ako, mosimba ako diha sa Espiritu." Kita n'yo, unsa man ang buhaton ninyo, buhata kini tanan diha sa Espiritu. Husto kana. Ug ang Espiritu ang nagahatag og Kinabuhi sa Pulong. Husto ba kana? Husto kana. Oo, sir.

All ye saints of Light proclaim,  
Jesus, the Light of the world;  
Grace and mercy in His Name,  
Jesus, the Light of . . .

Dayon unsa may atong buhaton?

We'll walk in the Light, beautiful Light,  
Come where the dewdrops of mercy are bright;  
Shine all around us by day and by night,  
Jesus, the Light of the world.

<sup>259</sup> Pasensiya na sa pagpalibog kaninyong mga magtutogtog, nga sama niana, apan nadala lang ako. Wala na ako'y nahibaloan pa kay sa ang pagsimba lamang. Sa ingon nianang pamaagi mo kini ginabuhat. Oo, sir. Mapasalamaton ako alang niining kahigayonan, Igsoong Mack, ang makaanhi ug makapakigkauban kanimo ug sa imong iglesia dinhi karong gabhiona, sa tanan niining maayo kaayong mga tawo.

<sup>260</sup> Ug kamo nga nagpataas sa inyong mga kamot alang sa bautismo sa Balaang Espiritu, nagasalig ako nga mahibalag ninyo si Pastor Mack dinhi, o ang uban kanila, ug mangbalik sa usa ka lawak dinhi. Ug hinumdumi lang, sa gilitok sa Dios ang Pulong sa sinugdanan, ug miingon, "Magkaaduna'y," magkaaduna gayud! Ug nag-ingon Siya, "Bulahan ang mga gigutom ug giuhaw sa pagkamatarung, kay sila pagabusgon." Kita n'yo, kinahanglan mahitabo gayud kini. Panganhi kamo aron duawon ang inyong pastor dinhi, ug magmaania samtang nga ginawali niya ang Maayong Balita.

<sup>261</sup> Karon atong kantahon kana nga karaan nga kanta pag-usab, gusto ko gyud kana, "We'll walk in the Light."

<sup>262</sup> Nag-ingon si Jesus, "Ako mao ang Kahayag," ug anaa kamo Kaniya. Kita n'yo? Unsaon man ninyo pagka-anaa Kaniya? Pagpamiyembro ba Kaniya? Dili. Paglamanohay ba? Dili. Pagbautismo ba sa tubig? Dili. "Pinaagi sa usa ka Espiritu kitang tanan nabautismohan ngadto sa usa ka Lawas, nga mao


ang Lawas ni Cristo.” Ug sa niana nga Lawas mao ang siyam nga mga hiyas nga espirituhanon nga nagapamuhat sa lokal nga lawas, sa lokal nga iglesia. Apostolikanhon kana, kung nasayran ko man kini. Husto kana.

So we'll keep in the Light, in the beautiful  
Light,

It comes where the dewdrops of mercy are . . .

[Nagapakig-estorya si Igsoong Branham kang Pastor Mack—Ed.] Sige . . . ? . . .

Shine all around us by day and by . . .

[Nagapakig-estorya si Igsoong Branham kang Pastor Mack—Ed.] Kalipay ko gayud! [Nagaingon si Igsoong Mack, “Salamat kanimo, igsoon. Salamat.”] 

*PAGKAUHAW* CEB65-0919  
(Thirst)

Kining Mensahe ni Igsoong William Marrion Branham, una giwali sa Ingles niadtong Dominggo sa gabii, Setyembre 19, 1965, sa Grantway Assembly Of God sa Tucson, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2012 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)